

PAULOVA'EA OMOMBE'UYPY CORINTOPEVA'EA PE

Primeira Carta de Paulo aos Coríntios

1 ¹Jihi ko Pauloramo. Sóstenes'ga oko ji pavēi no. Nhaneirūramo ko ga rekoi Cristo'gareheva'ero okovo ġwaramo. Kiro ji ikwatijari nhinhi'iġa imondovouka pe me. Tupana'ga ġwemimbotarimo Jesus Cristo'ga moirūukari ji ve ikwehe. “Eho ti Jesus Cristo'ga mombe'gwombe'gwovo ojipe'ġa pe ga repyga,” ei Tupana'ga ji ve ikwehe.

²Kiro ji ikwatijari imondovouka nhinhi'iġa pe me a'ero – perope peju cidade de Corinto pe pejiatykavo Tupana'ga mboheteavo. Pe ko Tupana'gareheva'ero. A'ereki Tupana'ga pe mo'emo'ē ojive. “Jireheva'ero ko pe ndekoi pejikoty'a Jesus Cristo'ga rehe,” ei Tupana'ga pe me. Ojipe'ġa gwyripeve'ġa pe nhaporemō ga ei no – kiroki ġa Jesus Cristo'ga mbohete jipi. Ga ko nhandepojykaharete'ga ġapojykaharete'ga no.

³Tupana'ga ti tomomyry pe me nhanderuvete'ga Jesus Cristo'ga pavēi nhandepojykaharete'ga pavēi. Tonoġatu ti ġa pepy'a nehē no.

Tupana'ga omomyry pe me

⁴Nhinhi'iġa nanani Tupana'ga pe ji ei: “Ndepyry hete nde imomyryva Corintopeve'ġa pe ġa jikoty'aro ġwaramo Jesus Cristo'ga rehe,” a'ea'e ji ga pe jipi pe mombe'gwovo. ⁵Pe jikoty'aro ġwaramo Jesus Cristo'ga pavēi Tupana'ga imomyryhetepavi pe me a. Ga okwahavuka pa pe me Jesus Cristo'ga mombe'ua. Pemombe'u kwaha hete pe Jesus Cristo'ga ojipe'ġa pe no. ⁶A'ereki Tupana'ga gweroviaheteuka pe me Cristo'ga mombe'ua. ⁷A'ero pe herekopavi Tupana'ga ra'uva remimbuhuhava pyryheteve'ea pe imboha'uvame Jesus Cristo'ga



(1Coríntios 1.3)

ukwahava. ⁸ Jesus Cristo'ga tuhê po ti pe mbojiko hete ojihe pe mongokatuavo avuirama nehê. A'ero po ti ga nombojari'i'i pe ndehe nehê ura'javame nehê.

⁹ Tupana'ga ġwembi'ea rupi oho jipi. Nurā nhande jikogi ga rehe. E'i ga pe me raikwehe tapejikoty'a ti jira'yra'ga pavêi javo. Nhandepojykaharete'ga pe ga ei Jesus Cristo'ga pe.

Ojogwayva ahe Corinto pe

¹⁰ Nhiirū, kiro ji ehetei pe me Jesus Cristo'ga repyga. Pembojo'jajo'ja ti penhi'ġa ojohupe. Tapejogwayvayvari ti. Pejihe'a katu ti ojogwehe imbojo'jajo'java pejeaporoġita. ¹¹ A'ereki Cloehêa rongapypeve'ġa omombe'u ji ve pejogwayvayvara. ¹² Ojoatyatyvihu po penhi'ġa. Nahā po pe ei. Jara'ġa e'i: “Ji ko Paulo'gareheva'ero.” Jara'ġa e'i: “Ji ko Apolo'gareheva'ero.” Jara'ġa e'i: “Ji ko Pedro'gareheva'ero.” Jara'ġa: “Ji ko Cristo'gareheva'ero.”

¹³ Cristo'ga jate ko penduvihavete'ga. Gareheva'ero ko pe nhaporemo a'ero. Maranuhū pe ndapejihe'ari ojogwehe naerū? Ji rūi reki amano yva rehe pendepykaramo ikwehe. Pe mobatizaramo po ġa nde'i pe me raikwehe: “Kiro pe ndekoi Paulo'gareheva'ero.” Nde'i po ġa a'ea pe me raikwehe. “Cristo'gareheva'ero kiro pe ndekoi,” e po ġa pe me raikwehe.

¹⁴⁻¹⁵ Ji nopomobatizatai ji ruvame pe pyri ikwehe. Pyri reki ji ve ji nopomobatizai. Po ji pe mobatizatai, a'ero po ġa etehei ji ve hamo: Ojiheva'ero Paulo'ga ġa mobatizai. Nopomobatizatai ji a'ero. Crispo'ga jate ji amobatiza Gaio'ga reheve Cristo'gareheva'ero ti ġa toko javo. ¹⁶ Gahā nohō, Estêfanas'ga rongapypeve'ġa ji amobatiza nohō. Ojipe'ġa po ji namobatizai ovuhu. ¹⁷ A'ereki a'ea rehe rūi Cristo'ga ji mbuhuruka avo. “Emombe'u ti

pyryva'ea ji mombe'gwovo ģa pe. Terenhi'iġatutehei ti ji mombe'urame ģa pe," ei ga ji ve ikwehe. Ako ji ganhi'iġa rupi a'ero. Nurā ji nanhi'iġatutehei Cristo'ga mombe'urame ģa pe. Po nahā ji nhi'iġatui ģa pe hamo, a'ero po nhinhi'iġatua rehe jate ģa ndekoi hamo. A'ero po Cristo'ga mombe'ua rehe ģa ndekoi hamo. Ndikwahyi po ģa pe Cristo'ga manoagwera ģa ndepyga a'ero hamo.

Tupana'ga okwaha hete

¹⁸Kiroki ģa oho hahyva'ea ruvihava viara rupi okote'varuhuro ġwaramo – nhande imombe'urame ģa pe Cristo'ga manoagwera nhande repyga, a'ero ģa ei: "Pemombe'u tehe pe ġwihā ore ve," ei ģa.

Nhande rehe ki a'e te Cristo'ga manoagwera mombe'ua ikwahy hete reki. A'ereki nhande xaho Tupana'ga ronga viara rupi nhandejikoga Cristo'ga rehe. Cristo'ga manoagwera pyvō Tupana'ga ikwahavukari nhande ve opopoakara. ¹⁹Nahā aherembikwatijara imombe'ui no Tupana'ga nhi'iġa mombe'gwovo hako. Tupana'ga e'i hako:

"E'i ģa ojive novia:

'Jireaporoġita katu hete ji ikwahaheteavo,' ei ģa ojive novia.

Kiro po ti ji imboukwahavukari ġandeaporoġitateha a'ero nehē," ei Tupana'ga hako.

Nahā aherembikwatijara omombe'u Tupana'ga nhi'iġa hako.

²⁰Maranuhū nanongara'ġa ndekoi naerū ikwahapyra'ġa pembo'ehara'ġa no? Marā onhi'iġatuhara'ġa no? Vvyakotyve'ġa e'i tehe nanongara'ġa pe: "Okwaha hete ģa." Tupana'ga ki a'e te omboukwahavuka reki ġanembikwahave'yma.

²¹Tupana'ga okwaha hete. A'ero ga ei: "Gweaporoġita rupi rūi po ti vvyakotyve'ġa ji kwahavi nehē," ei Tupana'ga ģa mombe'gwovo. A'ero ga ei ore ve: "Pemombe'umbe'u ti Cristo'ga manoagwera ģa pe," ei ga. "Kiroki ģa gwerovia penemimombe'ua ojikoga Cristo'ga rehe – ġahā po ti ji aru yvagi pe jijipyri nehē," ei Tupana'ga ore ve.

Ore imombe'urame Cristo'ga manoagwera ojipe'ġa pe, a'ero ģa etehei ore ve: "Pemombe'u tehe pe a'ea ore ve," e'i tehe ģa. ²²Judeus'ġa e'i ore ve: "Peapo na'ē ti ahemonhimomby'ava'ea torohepia," ei ģa. "Hepiagame jate po ti ore heroviari pe Cristo'ga mombe'urame ore ve," ei ģa ore ve. Judeus'ġarūive'ġa e'i ore ve: "Pe ikwahaheterame jate penhi'iġatuavo po ti ore heroviari penemimombe'ua nehē," ei ģa ore ve.

²³Ore ki a'e te oromombe'u katu Cristo'ga manoa yva rehe nhande repyga. Judeus'ġa onhimonha'nga reki oreremimombe'ua rehe. Judeus'ġarūive'ġa e'i reki ore ve: "Pemombe'u tehe pe a'ea ore ve," ei ģa. ²⁴Na rūi reki ore imombe'urame Tupana'ga remimo'ēhara'ġa pe. Tupana'ga omo'emo'ē ģa ojive toko ti ģa jireheva'ero javo. Judeus'ġa pyteripeve'ġa hugwi ga omo'emo'ē ģa. Judeus'ġarūive'ġa pyteripeve'ġa hugwi ga omo'emo'ē ģa no. Ore imombe'urame Cristo'ga manoa ģa pe ģa ei: "Cristo'ga gwepiuka nhande ve Tupana'ga popoakara," ei ģa. "Okwahavuka ga nhande ve Tupana'ga reaporoġita no.

A'ereki Tupana'ga okwaha hete,” ei ģa. ²⁵Ojipe'ġa e'i tehe Tupana'ga pe: “Ga ndokwahavihu,” ei ģa javo tehe. Ga okwaha hete reki nhande hohe pa. Ģa e'i tehe ga pe no: “Tupana'ga ndipopoakarihu. A'ereki gara'yrava'ea omano,” ei ģa javo tehe. Nhande hohe pa reki Tupana'ga popoakaramo.

²⁶Nhiirü, pekwhava'ja pejikoagwera Tupana'ga pemo'emo'ërame ojive ikwehe. A'ea rupi pe mombe'urame ojipe'ġa ei: “Mokonha'ġa jate okwaha hete. Mokonha'ġa jate ipopoaka hete,” ei ģa. “Mokonha'ġa jate huvihavuhu. Jara'ġa ndokwahavihu pa,” ei ģa pe mombe'gwovo. ²⁷Ģa e'i pe me ikwahapyre'ÿve'ġa. Tupana'ga ki a'e te e'i pe me: “Opomo'emo'ë ji jijive tahepiuka ti ikwahapyra'ġa nembikwahave'yima,” ei Tupana'ga pe me. E'i ģa pe me ipopoakare'ÿve'ġa. Tupana'ga ki a'e te e'i pe me: “Opomo'emo'ë ji jijive tahepiuka ti ipopoakave'ġa popoakare'yima,” ei Tupana'ga pe me. ²⁸Pe ndehe ģa ndokoi okoteheve'ġa javo pe me. “Huvihava'ġa rüi,” ei ģa pe me. Tupana'ga ki a'e te e'i pe me: “Opomo'emo'ë ji tahepiuka ti huvihava'ġa ndekotehea,” ei ga. ²⁹Nurã Tupana'ga ei tonhimbohete'pavyme ti ģa ji pyri a'ero.

³⁰Tupana'ga pe mbojikoty'aruka Jesus Cristo'ga pavëi. A'ero Cristo'ga okwahavuka nhande ve Tupana'ga reaporoġita. Cristo'ga nhande mombyry no Tupana'ga rerekokatuavouka nhande ve. Cristo'ga nhande mongo Tupana'gareheva'ero. Cristo'ga nhande mbopiro'yi nhanderekote'varuhua hugwi no. Nahã nhande rekoi Tupana'ga nhanembojikoty'arukaro ġwaramo Jesus Cristo'ga pavëi. ³¹A'ea pe Tupana'ga rembikwatijarukara e'i a'ero:

“Kiroki ģa ombohete pota

– tombohete ti ģa nhandepo'jykaharete'ga jate
ndepyry hete nde ji ve javo,” e'i ikwatijara hako.

Cristo'ga manoagwera mombe'ua

2 ¹Nhiirü, jihorame pe pyri ji imombe'ukatui pe me Tupana'ga mombe'ua ikwehe. A'ea nhande ymya ndikwahavi. Ikwahapyra'ġa'jarüiva'ero reki ji imombe'ui pe me. Nanongara'ġa onhi'iġatu hete jipi orokwaha hete ore javo pe me. Ji ko na rüi amombe'u pe me a'ero. ²Nahã ji ei jiyvyteri pe: “Jesus Cristo'ga jate po ti ji amombe'u ġapyteri pe nehë gamanoagwera yva rehe imombe'gwovo nehë,” a'e ji jiyvyteri pe.

³Jipopoakare'ymamo ji rekoi pe pyri a'ero. Ahyhyi ji jikyhyjiavo mara'ngu po ti ji Cristo'ga mombe'ukatuavo ģa pe javo.

⁴Ikwahapyra'ġa'jarüiva'ero ji ga mombe'ui pe me. Pe mbo'erame ji nda'ei toko ti ģa nhinhi'iġatua rupi jave'yima pe me. Nhiremimombe'ua pyvö Tupana'ga ikwahavukari reki pe me gwa'uva popoakara. ⁵Tupana'ga okwahavuka a'ea pe me jipopoakara ti tombojikoguka ģa Cristo'ga rehe javo. Vvyakotyve'ġa nembikwahava rüi pe mbojikoguka ga rehe a'ero.

Tupana'ga ra'uva okwahavuka gareaporoğita

⁶Tupana'ga reaporoğita reki ore imombe'ui ğa pe – kiroki ğa okwaha hete Cristo'ga. Vvyakotyve'ğa ndeaporoğita ore noromombe'ui ğa pe. Noromombe'ui ore ğandeaporoğita no – kiroki ğa vvyakotyve'ğa mondomondoi ğwemimbotarimova'ea rehe jipi. Ğa igwaigwavete ndipopoakari nehē. ⁷Onhimiva'ea ore oromombe'u Tupana'ga rembikwahava. Ymya ga ndokwahavukari a'ea vvyakotyve'ğa pe. Emo yvya apoa renonde ga e'i nhoğwenonde jupe hako. “Nhirembikwahava po ti ğambohuvihavuhuağwama nehē,” ei Tupana'ga hako. Nahã Tupana'ga e'i nhoğwenonde nhande mombe'gwovo hako.

⁸Vvyakotyve'ğa nduvihava'ğa ndokwahavi a'ea raikwehe. Po ğa ikwahavi hamo, a'ero po ğa nombovyrukari Cristo'ga mo'ama yva rehe ga jukavo hamo. Ga ko Tupanamo huvihavuhu hete reki.

⁹Aherembikwatijara Tupana'ga mombe'uhava e'i reki hako:

“Ymya Tupana'ga e'i:

‘Tamomyry hete ti nhiarõhara'ğa pe,’ ei ga,” ei ahe.

“Ndihepiagi pa nhande nanongara Tupana'ga remimomyryvağwama,” ei ahe hako.

“Nihenduvi pa a'ea no.

Niandeaporoğitai pa nhande nanongara rehe Tupana'ga remimomyryvağwama rehe,” ei ahe ikwatija hako.

¹⁰Nhande ve reki Tupana'ga ikwahavukari onhimiva'ea. Gwa'uva pyvõ ga ikwahavukari nhande ve. A'ereki a'ea gwepia pa ikwahapava. Tupana'ga ra'uva okwaha pa gareaporoğita onhimiheteve'ea.

¹¹Nhandereaporoğita ojipe'ğa ndokwahavi. Nhande jate tikwaha nhandereaporoğita. Na jitehe ojipe'ğa ndokwahavi Tupana'ga reaporoğita. Gara'uva jate okwaha a'ea. ¹²Ndirekoi reki nhande ğandeaporoğita – kiroki ğa ndojikogi Tupana'ga rehe. Tupana'ga ra'uva reki ojikoty'a nhande pavēi. A'ereki Tupana'ga ombuhu gwa'uva nhande pyri tokwaha ti ğa nhiremimomyryva ojive javo.

¹³Tupana'ga remimomyryva rehe gara'uva ojipe'ğa mbo'eukari ore ve. Ikwahapyra'ğa ndeaporoğita nomb'o'eukari ore ve a'ea rehe. Igwete ore imombe'ukatui Tupana'ga ra'uva remimbo'ea ğa pe – kiroki ğa ojikoty'a gara'uva pavēi. ¹⁴Kiroki ğa ndojikoty'ari gara'uva pavēi – ğa ndogwerekoi Tupana'ga ra'uva remimbuhura. Ore imombe'urame ğa pe ğa ei: “Pemombe'u tehe pe a'ea,” ei ğa ore ve. Ndokwahavi tuhē ko ğa a'ea.

Ğahã jate – kiroki ğa ojikoty'a Tupana'ga ra'uva pavēi – ğahã jate onhimombaragwaha nanongara rehe ikwahava. ¹⁵Ğahã okwaha pa. Onhimombaragwaha ğa pyryva'ea rehe. Onhimombaragwaha ğa pyryve'ÿva'ea rehe. Emo ğandeaporoğita pe po ojipe'ğa nde'i hamo

ikwahave'yima. A'ereki ãa ndojikoty'ari Tupana'ga ra'uva pavêi. ¹⁶Nahã Tupana'ga ikwatijarukari ahe ve hako. Igwete ahe ei hako:

“Ndokwahavi pa ãa nhandepojykaharete'ga reaporoãita.

Nomoãitai pa ãa ga javo ga pe,” ei ikwatijara.

Nhandereaporoãita reki Cristo'ga reaporoãita'java'ea.

Peko ti Tupana'ga reaporoãita rupi

3 ¹Nhiirũ, jiruvame pe pyri ji namombe'ui onhimiheteva'ea pe me ikwehe. Pejikoty'a pe Tupana'ga ra'uva pavêi novia. Emo pe ndapekoi ve Cristo'ga remimbotarimova'ea rehe. Tayri'ãa javuhu pe ndapekwahavi a. ²Nurã ji namombe'ui ve pe me onhimiheteva'ea ikwehe. Jukwahava'ea jate ji imombe'ui pe me a'ero. Po ji imombe'ui onhimiheteva'ea pe me, a'ero po pe ndapekwahavi a'ea hamo. Na jitehe kiro ji imombe'urame onhimiheteva'ea po ti pe ndapekwahavi. ³A'ereki penhimimbotarimova'ea rehe pe ndekoi jipi.

Jukwaha reki a'ea. Penhimyrõ ko pe ojogwehegwehe. Pejogwayvayva ko pe no. Nurã ko ji ei pe me: Peko pe penhimimbotarimova'ea rehe. Cristo'gareheve'ãa'jarũiva'ea ko pe. ⁴Pe'e tehe pe javo ojohupe jipi. Jara'ãa e'i tehe: “Ore ko Paulo'gareheva'ea,” ei ãa. Jara'ãa e'i: “Ore ko Apolo'gareheva'ea.” Nahã po pe etehei pejikovo penhimimbotarimova'ea rehe.

⁵Marã tuhẽ Apolo'ga reko i naerũ? Marã ko ji reko i naerũ? Tupana'ga remimbotarimova'ea rehe a'ero ore memei oroko. Tupana'ga Cristo'ga mombe'uuka ore ve pe mbo'eavouka. A'ero pe jikogi Cristo'ga rehe ikwehe.

⁶⁻⁹Tamombe'u kiro pe me ojo'java'ea a'ero tapekwaha ti nhanderekoa. Tupana'gareheva'ero ko pe kohoa'java'ea. Kohoa jara'ga'jave'ga ko Tupana'ga. Tupana'ga moirũharamo ko ore ãa ja a'ero – kiroki ãa gwereko katu kohoa. Nahã ko kohoa rerekokatuhara'ãa ndekoi jipi. Ojipe'ga otỹ ha'yinha. Aerẽ ojipe'ga imoakỹakymi herekovo. Tupana'ga reki omonhimomboakaruka ãa pe. Na jitehe ore pe nderekokatui. Jihi amombe'u ypy Cristo'ga pe me. Aerẽ Apolo'ga pe mbo'embo'ei ga rehe. Tupana'ga reki pe mbojikoguka hete jipi Cristo'ga rehe. Ojipe'ga otỹ, ojipe'ga omoakỹakỹ. Tupana'ga jate omonhimomboakaruka ãanemityma. Gaha jate ko huvihavetea a'ero. Itỹhara'ga huvihava rui imoakỹhara'ga pavêi. Na jitehe ji huvihava rui Apolo'ga pavêi. Tupana'ga jate ko huvihavetea pe mbojikoguka hete Cristo'ga rehe. Ore memei oroporavyky Tupana'ga pe Cristo'ga mombe'gwovo ojipe'ãa pe. Kiroki ãa oporavyky Tupana'ga pe – ga po ti okwepy imondovo ãa pe nehẽ.

Tupana'gareheva'ero ko pe peko onga'java'ero no. ¹⁰Ore ko oroko onga apohara'ãa'java'ero. Nahã po ahe japorame onga. Ojipe'ga ombovy okyta imo'ama. Aerẽ ojipe'ga imondoi heheva'ea japopava. Na ja ore pe ndereko katu a'ero. Tupana'ga ji mbokarakaturame ji amombe'u katu ypy Cristo'ga pe me pe mbojikogauka ga rehe. Kiro ojipe'ga pe mbo'embo'ei ga rehe a'ero. Kiroki ãa pe mbo'e – ãa po pe mbo'e katu a'ero hamo.

¹¹Jesus Cristo'ga jate ko nhande timombe'u ypy ojipe'ãa mbojikoguka

ga rehe. Ojipe'ga rûi po nhande timombe'ua ppy hamo. A'ereki Jesus Cristo'ga Tupana'ga omombe'uuka ga rehe jate ti pejiko javo.

¹²Japorame mbatera imondovo jypyva'ea rehe jara'ğa opo'ru pyryheteve'ea – kiroki ndopavi a, ndokai no. Ouro ға opo'ru, prata. Ita'ia ға opo'ru, ikatuheteve'ea – kiroki he'yjuhu ahe omondo itambere'ia hehe. Jara'ğa ki a'e te opo'ru opava'ea, okaiva'ea. Yva ға opo'ru, nhungwava, pindova. ¹³Ikairame ғанембиapoagwera jukwaha reki ndapyryviva'ea. A'ereki tata ombokai pa ndapyryviva'ea ға hugwi. Jukwaha pyryheteve'ea no. A'ereki tata omboukwaha pyryva'ea nhimomiranama imbokaipave'yname.

Na jitehe jara'ğa pe mbo'e katu Jesus'ga rehe. Jara'ğa napembo'ekatu ga rehe. Jesus Cristo'ga rurame po ti jukwahavamo ғанемимbo'ea nehë, ғанемимbo'ekatua. Jukwaha po ti ғанемимbo'ekatue'yma nehë nohë. Penembikwahava repiagame po ti Tupana'ga ikwahavi ja'javo pembo'ehara'ğa pe nehë. ¹⁴Po ti pe ikwahahetei Jesus'ga mombe'ua pejikoga ga rehe, a'ero po ti Tupana'ga imombyryhetei pembo'ehara'ğa pe nehë pembo'e katu pe ға javo ға pe. ¹⁵Po ti pe ndapekwahavi Jesus'ga mombe'ua, a'ero po ti Tupana'ga nomombyryvi pembo'ehara'ğa pe nehë napembo'ekatujuhu pe ға javo ға pe. Oho po ti ға yvagi pe nehë novia ojikoga ғwaramo Jesus'ga rehe. Emo po ti Tupana'ga e'i ға pe: “Napembojikhohetei pe ға Cristo'ga rehe,” e po ti ga ға pe nehë.

¹⁶Pe ko Tupana'ga ruhava. A'ereki gara'uva oko pe pyri. Pekwaha po pe a'ea hamo. ¹⁷Po ға imbote'varuhui pe me, a'ero po ti Tupana'ga imbote'varuhui ға pe nehë. A'ereki pe garuhava pyryheteve'ea.

¹⁸Tapenhimoandyandyi ti. Po pepyteripeve'ga e'i tehe ojive: “Yvyakotyve'ğa ndeaporoğita rupi ji akwaha hete.” Topohi ti ga ғandeporoğita hugwi. Toko ti ga Tupana'ga reaporoğita rupi. Ga rekorame Tupana'ga reaporoğita rupi po ti ға ei ga pe ndokwahavihu ga javo novia. Emo po ti ga okwaha hete tuhë nehë. Tapenhimoandyandyi ti a'ea rehe a'ero.

¹⁹Yvyakotyve'ğa e'i tehe ojipyteripeve'ğa pe: “Gweaporoğita katu hete ға ikwahava.” Tupana'ga ki a'e te e'i ға pe: “Gweaporoğita tehe reki ға. A'ereki ға ndokwahavihu,” ei ga. Igwete garembikwatijarukara i'ei no:

“Gweaporoğita kwaha ға ojipe'ğa moandyandyita.

Emo Tupana'ga okwaha ға mombiga ға
ndeaporoğitate'varuhurame,” ei ikwatijara.

²⁰Iru'ia ikwatijara i'ei no:

“Nhandepojykaharete'ga e'i:

'Heaporoğita tehe ға

– kiroki ға e'i tehe ojive

orokwaha hete ore javo,' ei ga,” ei ikwatijara.

²¹Tapembohetei ojipe'ga ji ko ndereheva'ero javo ga pe. Pehe reki pereko pa. Ore nhaporemko pendeheva'ero pepokohavamo. ²²A'ereki jiji pe poko. Apolo'ga pe poko. Pedro'ga pe poko. Yvya ko pendepykavamo. Pemanoe'yma ko pendepykavamo. Pemanoa ko pendepykavamo.

Aḡwamova'ea pendepykavamo. Aerēva'ea pendepykavamo. A'ereki pe pereko pa a'ea pejipokohavamo. ²³A'erorame tehe pe pepoko Cristo'ga gareheva'ero. Cristo'ga ko opoko Tupana'ga gareheva'ero.

Cristo'ga moirūharava'ea poravykya

4 ¹Nahā po pe ei ore mombe'gwovo a'ero hamo: “Ḡa ko Cristo'ga remimbotarimova'eaheheva'ero oko ga pokoga,” pe'ji po pe hamo. “Tupana'ga nhande mbo'euka ḡa pe aherembikwahavipyre'yma rehe tokwaha ti ḡa kiro javo. Nahā ga nhimoirūkari ḡa pe.” A'ea po pe ei ore mombe'gwovo hamo. ²Huvihava'ḡa e'i omoirūhara'ḡa pe jipi: “Peporavyky katu ti ji ve a'ero pejikovo nhinhi'ḡa rupi,” ei ḡa ḡa pe. ³Jesus Cristo'ga e'i jiporavykya pe a'ero. Pe erame jupe ji ndahaykai reki. Ji ndahaykai ojipe'ḡa erame jiporavykya pe no. Jihi vehevi nda'ei jupe. ⁴Jipoyja hete ji jivyvteri pe. A'ereki ji aporavyky katu Cristo'ga pe jirekote'varuhue'yma. Ji ero ḡwaramo rūi reki jukwahavamo jiporavykypyryva. Nhandepojykaharete'ga po ti e'i jupe nehē Jesus Cristo'ga. ⁵Nurā ji ei pe me: Tape'ei ti penhinonde ojipe'ḡa poravykya pe. Cristo'ga urame po ti hepiukari nhande ve onhimiva'ea nehē – kiroki nhande ndikwahavi ve. Okwahavuka pa po ti ga nhandereaporoḡita nehē. Nhande poravykykaturame nhandekovo katu po ti Tupana'ga nhande mbohetei a'ea rupi nehē. ⁶Nhiirū, imombe'upavame a'ea pe me ji nhimombe'ui pe ndepyga. Apolo'ga ji amombe'u ko no. Pe me ji imombe'ui orerekoagwera tapenhimbo'e ti pejikovo ikwatijara rehe jate nehē. Tapembohetei ti ojipe'ḡa gareheva'ero ko ji javo. “Ji ndakoi ojipe'ga rehe,” tape'jiuhui ti. ⁷Tapenhimbohetei no ji ko ḡa hohe javo. A'ereki ojo'jajo'java'ero pe peko. Tupana'ga remimondotehea reki pe pereko. Gaha omondo pe me. Nurā pe herekoi. Tapenhimbohetei ti a'ero. A'ereki peapoa ko Tupana'ga remimondoa. ⁸Perekopavipe pe Tupana'ga remimondotehea naerū? Ndaperekopavi tuhē reki pe a'ea. Pe teheuhu peko huvihavamo naerū ore reko'e'yname nahā naerū? Po pyry pe ndekoi huvihavamo novīa ore ti toroko huvihavamo pe pavēi novīa. ⁹Emo Tupana'ga po e'i ore ve ovuhu: “Nhimoirūhara'ḡa ko koji'i toko tehe ojipe'ḡa hohe pa,” e po ga ore ve. Ore po ḡa ja – kiroki ḡa pe ḡa e'i tijukauka ḡa ojipe'ḡa ndovaki javo, a'e ji. A'ereki ḡa nhaporemō ore repiaguhu ḡa ko mbipehu javo ore ve. Yvyakotyve'ḡa e'i a'ea ore ve yvagipeve'ḡa pavēi. ¹⁰Ore Cristo'gareheva'ero ḡwaramo ḡa ei ore ve: “Ndapekwahavihu pe,” ei ḡa ore ve. Pe ki a'e te pe'ji tehe pejive: “Cristo'gareheva'ero ore orokwaha hete.” Ore ve ḡa ei: “Ndapepopoakarihu pe.” Pe ki a'e te pe'ji tehe pejive: “Orepopoaka hete ore ojipe'ḡa mondovo.” Pe ndehe ḡa ndekoi pe mboheteheveavo jipi. Ore rehe ki a'e te ḡa ndekoi tuhē. ¹¹Orety'a ore jipi. Ore ygywei ore nohō. Ndorogwerekoi ore tapy'ynhapira. Ore nupanupā ḡa ore rerekote'varuhuavo. Oropytaahi'vii'viuhu ore jipi. Nahanahā ore rekoi kiromo jate. ¹²Oroporavyky hete ore oropokapavamo toropyhy ti mbatera orojive javo. Ḡa ete'varuhurame ore ve ore ei reki: “Tupana'ga ti tomomyry pe me.” Ḡa imbohahyukarame ore ve ore

nhimomiranami reki. ¹³Ĝa ore mbotegweterame ore nhi'iĝatui reki ĝa pe. Aĝwamo vehevi ore mbatera ratykwera'java'ea aheremimombora'java'ea ĝa pe – kiroki ĝa ndojikogi Cristo'ga rehe.

¹⁴Kiro ji ikwatjarukari pe me. Emo ji nda'ei tipoyjayjaryme ti ĝa javo pe me. Tambo'e ti ĝa javo ji ei pe me jira'yra'java'ea pe. A'ereki ji opoarō hete. ¹⁵Po pembo'ehara'ĝa he'yjuhu hete novia, po ĝa dez mil novia. Emo ojipeji reki jihi jate ako penduva'java'ero pe nderekovo katu. Ojipe'ĝa omombe'u Jesus Cristo'ga kiro pe me. Jihi ki a'e te pe mbojikogypy ga rehe pyryva'ea mombe'gwovo pe me ikwehe. ¹⁶Nurā ji ehetei pe me: Ji rupi ti peho pejikokatuavo. ¹⁷A'ero ji Timóteo'ga mondoi kiro pe pyri. Ga ko jira'yra'java'ea ji ve. A'ereki jihi ga mbojiko Cristo'ga rehe. Ako hete ji ga rehe. Ga rehe ji jikogi no. Igwete ji Timóteo'ga mondoi pe pyri tokwahavukara'ja ti ga pe me jirekoagwama ji jikoty'arama Cristo'ga pavēi. A'ea rehe ji Cristo'gareheve'ĝa mbo'embo'ei jipi no jihorame ĝagwyri pe nhapremo.

¹⁸Jararamo pepyteripeve'ĝa nhimbohetetehei kiro Paulo'ga po ti nduri nhande pyri nehē javo tehe ji ve novia. ¹⁹Emo Tupana'ga ipotarama po ti kotihi ji hoi pe pyri nehē. Tihepia ti ĝa herekorame Tupana'ga popoakara a'ero, a'e ji. A'ea ji takwaha. Ĝanhi'iĝa jate rūi ji takwaha ĝa nhimboheteteherame. ²⁰A'ereki Tupana'gareheva'ero nhande nianhi'iteheuhui. A'ero koi nhande rekokatui Tupana'ga popoakara pyvō. ²¹Marā po ti ji rurame pe pyri a'ero nehē? Pe pohire'ymame pendekoagwera hugwi po ti ji nhi'iĝahyi pe me imbohahyuka nehē. Pe pohirame jugwi po ti ji rekoj pe ndehe pe nderekonhyromo nehē jirurame pe pyri nehē. Marāva'ea po pe pepota naerū?

Ndoakwahavihu ahe

5 ¹Kiro ji ei pe me: Omombe'u ĝa ji ve pepyteripeve'ga. “Ndoakwahavihu ga okovo,” ei ĝa ga mombe'gwovo. A'ereki ga gwereko gwuva'ga rembirekohēa. Ite'varuhu hete a, xa'e pa nhande jupe. Tupana'gareheve'ĝarūive'ĝa vehevi e'i ite'varuhu nanongara pe no. ²Penhimboheteuhu pe naerū oroko katu pa ore javo tehe naerū? Ndapevy'arihu hete po pe ga rehe hamo. Pepe'a ti ga pejipytera hugwi ga mondovo pejatykarame jipi Tupana'ga mboheteavo. ³⁻⁴Jira'oa ko irupe pe hugwi kiro novia. Emo ji amondo jireaporoĝita imongovo pe pyri. Ji ndakoi pe pyri novia. Emo ji a'e jipe akoja'ga pe. “Jesus'ga nhandepojykaharete'ga e'i nde ve: ‘Nde ereko te'varuhu,’ ei ga nde ve,” a'e ji ga pe a'ero. Pejatykarame po ti ji imondoi jireaporoĝita pe pyri nehē. Jesus'ga popoakara po ti pe nderekoi nehē no. ⁵Pejatykarame ti pekwava'ē akoja'ga Satanás'ga pe tombotegwete ti ga gara'oa nehē. Jesus'ga ti togweroho gara'uva yvagi pe a'ero nehē ura'javame nehē.

⁶Ndapyryvi reki pe nhimboheterame oroko katu pa ore javo tehe. Nhande japorame pāo xunhiete'i nhande imondoi imbovuhava hu'uma pype. A'ero ivuvuvuvupavi upa. Na jitehe ojipejive'ga okote'varuhuve'ga pytarama pepyteri pe, a'ero ojupi pavēi po ga pe mondoi nehē pe mongote'varuhuuka. Ndapekwahavi

pe a'ea naerũ? 7Páscoa rupi judeus'ğa imombopavi imbovuhava ymyava'ea pão reheve tipyahu ti hu'uma a'ero javo – kiroki hu'uma ndogwerekoi imbovuhava. Na jitehe pe pohipavi ymyava'ea hugwi pejikote'varuhua hugwi ikwehe tipyahu ti nhandereaporoğita a'ero javo. A'ereki na tuhẽ pe pendeaporoğita pyahu pejikoga ğwaramo Cristo'ga rehe. A'ereki Cristo'ga omano nhanderekote'varuhua momboa. Pepohi pa ti pejikote'varuhua hugwi a'ero. Ymya judeusva'ea ijukai cordeiros hako tomanoyme ti nhandera'yrypy'ğa javo hako. Ağwamo ğa Jesus'ga jukaukari raikwehe. Jesus'ga omano nhande repyga tohoyme ti ğa hahyva'ea ruvihava pype omanorame javo. 8Nurã ti xako katu jipi. Xapohi ti nhanderekote'varuhua hugwi. Tiandereaporoğita katu ti nhandekovo. Xanhi'i ti a'itituhẽva'ea rehe.

9Akwatijaruka ji imondovouka pe me ikwehe. Ikwatijarukarame ji ei pe me: “Tapejihe'ari ti ğa ndehe ğa akwahave'ymuhũrame nehẽ,” a'e ji pe moğitavo ikwehe. 10Ji nda'ei ğa pe – kiroki ğa ndojikogi Jesus'ga rehe. Nanongara'ğa ko ndoakwahavihu. Ğa opotarahivuhu mbatera jipi. Omiomio ğa ojipe'ğa mbatera ğa hugwi. Oko hete ğa ha'angava rehe ğwemimbohete'hara rehe okoe'yma Tupana'ga rehe. Nanongara'ğa pe rui ji ei pe me: “Tapejihe'ari ti ğa ndehe.” A'ereki yvya koty pejikoro ğwaramo pe pejihe'a tuhẽ ğa ndehe jipi. 11Ji ikwatijarame pe me kiro ğa pe ji ei – kiroki ğa e'i ojive novia: “Ji ko peirũa. Jesus'gareheva'ero ko ji,” ei ğa javo novia. Emo ğa ndoakwahavihu. Jara'ğa opotarahivuhu mbatera. Jara'ğa oko hete ha'angava rehe ğwemimbohete'hara rehe okoe'yma Tupana'ga rehe. Jara'ğa e'i te'varuhu ojipe'ğa pe. Jara'ğa ko heagwryrvuhu. Jara'ğa omiomio ojipe'ğa mbatera. Nanongara'ğa erame ji ko Jesus'gareheva'ero javo novia, tapejihe'ari ti ğa ndehe. Tape'ui jitehe ti ğa pavẽi.

12-13Kiroki ğa ndojikogi Jesus'ga rehe – ğa pe ji nda'ei peko te'varuhu pe javo. Tupana'ga gwe ti e'i ğa pe nehẽ. Ga pe ki a'e te – kiroki ğa ojatyka pe pavẽi Tupana'ga mboheteavo – ğa pe po pe ei hamo ğa ndekote'varuhurame. Nahã Tupana'ga rembikwatijarukara i'ei no: “Pemombo ti okote'varuhuve'ga pejipytera hugwi,” e'i.

Pemohiğatu ti ojohupe

6 1Penhoirũ ko pe Jesus'gareheva'ero. Nurã ji ei pe me: Pejogwayvaramame ti tapejogwerohoi juizes'ğa pyri – kiroki ğa ndokoi Tupana'ga rehe. Tapejogwerohoi ti nanongara'ğa pyri tomohiğatu ti ğa nhande ve javo. Jesus'gareheve'ğa jate ti tomohiğatu pe me. 2Tupana'gareheva'ero po ti pe epe'ei imohiğatuavo Tupana'ga rembiapo'ğa pe nehẽ. Cristo'ga rura'javame po ti pe ei ğa pe nehẽ. Ndapekwahavi pe a'ea naerũ? Po ti pe imohiğatui jal'javo ğa pe nhaporemonehẽ, marã po pe ndapehekaturi imohiğatuavo nonhimimiva'ea ojohupe naerũ? 3Xa'e po ti nhande imohiğatuavo yvagipeve'ğa pe nehẽ no Tupana'gapyrive'ğa pe. Ndapekwahavi pe a'ea? Po ti nhande ei ğa pe vehevi nehẽ, yvyakotyva'ea pe kaitu po nhande imohiğatui kiro hamo. 4Pe jogwayvaramame mbatera rehe tapejogwerohoi ti ğa pyri a'ero – kiroki ğa pe Jesus'gareheve'ğa e'i ndapyryvi ğa javo. Nanongara'ğa pyri

tapejogwerohoi a'ero nehẽ tomohigatu ti ģa nhande ve javo. ⁵A'e ji kiro pe me tapepojyjayari ti pejikovo. Ndogwerekoi'i'i ikwahapyra'ga pepyteri pe naerũ te'i ti ga peirũ'ģa ndeaporoģita pe ģa ndayvarama naerũ? ⁶Nurã pe peirũ'ģa nderohoi juizes'ģa pyri Jesus'gareheve'ģarũive'ģa pyri naerũ te'i ti ģa nhandeaporoģita pe javo. Na rui po pe ndekoi hamo.

⁷Ndapyryvi tuhẽ pe me pejogwerohohava juizes'ģa pyri pejogwayvaro ģwaramo. Peirũ'ģa ndekote'varuhurame pe me nandejate a'ero. Ģa imimame pembatera pe hugwi tapejipygi ti ģa ndehe. ⁸Pehe reki peko te'varuhu ģa pe a. Pemi reki pe ģambatera ģa hugwi – kiroki ģa peirũ'ģa vehevi Jesus'gareheve'ģa.

⁹Okote'varuhuve'ģa po ti nduvi Tupana'ga pyri yvagi pe nehẽ. Ndapekwhavi pe a'ea naerũ? Tapenhimoandyandi ti. Kiroki ģa ndoakwahavihu – nduvi po ti ģa Tupana'ga pyri nehẽ. Kiroki ģa oko hete ha'angava rehe imboheteavo – nduvi po ti ģa ga pyri nehẽ no. Kiroki ģa gwereko ojipe'ģa nembireko'ģa – nduvi nehẽ no. Kiroki ģa ojogwereko akwaimbae'ģa memenhuhũ – nduvi po ti ģa Tupana'ga pyri na jitehe nehẽ no. ¹⁰Iporomive'ģa po ti nduvi pevo nehẽ no. Kiroki ģa opotarshivuhu mbatera na jitehe no. Heagwryryve'ģa po ti nduvi nehẽ no. Ģahã no – kiroki ģa e'i te'varuhu ojipe'ģa pe. Kiroki ģa onupahũ ojipe'ģa herua mbatera ģa hugwi – nduvi po ti ģa Tupana'ga pyri yvagi pe nehẽ no. ¹¹Na jitehe ko pe jararamo ikwehe novia. Emo Jesus Cristo'ga omombo pendekote'varuhua pe hugwi pe mo'emo'eamo pe mombyryva Tupana'ga ra'uva pavẽi ikwehe. Tupana'ga nhande timbohete jipi.

Penda'oa ko Cristo'ga apoa kiro

¹²Pe'ji po pe: “Cristo'gareheva'ero ģwaramo ji ndajikwakuvi. A'ero ji rekoi nhiremimbotarimova'ea rehe,” pe'ji po pe novia. Ji na jitehe ndajikwakuvi novia. Emo jara aheremimbotarimova'ea ndapyryvi reki ahe ve. A'ereki a'ea ahe pojyka. Nurã ji ndakopavi nhinhimimbotarimova'ea rehe tajipiro'y ti nanongara hugwi – kiroki ahe pojyka, a'e ji pe me. ¹³Pe'ji po pe no: “Tupana'ga oapo mbiara a'ea ti toho ģandevaga pype javo. Ga oapo nhanderevega no a'ea pype ti mbiara toho javo,” pe'ji po pe. A'ero pe etehi: “Na jitehe Tupana'ga oapo nhandera'oa tojogwerekoreko ti ģa akwaimbae'ģa kunhangwera'ģa pavẽi javo,” pe'ji tehe pe. “Nurã ko pyry nhande ģa nderekohetei. Tireko ti ojipe'ģa nembireko'ģa no,” pe'ji tehe pe. Nanongara rehe ti tapekoi, a'e ji pe me. Tupana'ga oapo tuhẽ nhanderevega mbiara reheve. Emo po ti ga omomba memei nehẽ no. Tupana'ga ndoapoi nhandera'oa kia pyvõ ti ģa togwerekõ ģa javo. Oapo ga nhandera'oa nhandeaporoģita reheve a'ea pyvõ ti ģa tombohete Jesus Cristo'ga javo. Ga ko nhandepojykaharete'ga. Gaha ti topojyka nhandera'oa nhandeaporoģita reheve. ¹⁴Tupana'ga ombogwera nhandepojykaharete'ga gamanoa hugwi ikwehe. Aerẽ po ti ga nhande mbogweravi jitehe nehẽ opopoakara pyvõ nehẽ no.

¹⁵ Cristo'gareheva'ero pe pejikoty'a ga pavēi. A'ero penda'oa ko Cristo'ga apoa. Ndapekwahavi pe a'ea naerū? Taperekoi ti ġa'upahara'ġa a'ero. Maranuhūrame po pe imondouhui penda'oa Cristo'ga apoa ġa'upahara'ġa pe ġa nderekouvouka jupe naerū? Taperekoukari ti ġa peja'oa pe, a'e ji. ¹⁶ Ga ġa'upaharahēa rerekorame ġa jikoty'ari ojipejiva'ea'java'ero. Ndapekwahavi pe a'ea naerū? A'ereki Tupana'ga rembikwatijarukara e'i:

“Ġa ojogwerekoro ġwaramo ojipejiva'ea'java'ea akwaimbae'ga kunhahēa pavēi,” e'i ikwatijara.

¹⁷ Emo nhanderekorame Cristo'ga pavēi nhande xajikoty'a ojipejiva'ea'java'ero gara'uva pavēi.

¹⁸ Taperekouhui tuhē ti ġa a'ero. Ġa nderekouhurame ġa imbote'varuhui gwa'oa pe. Ojipea ġandekote'varuhua ko na rūi ġa pe. ¹⁹ Penda'oa ko Tupana'ga ra'uva ruhava. A'ereki gara'uva oko pe pyri jipi. Ndapekwahavi pe a'ea naerū? Tupana'ga omondo gwa'uva, pe imbuhuri pejipyri. Penda'oa ko peapoa rūi a'ero. Penda'oa ko Tupana'ga apoa. ²⁰ A'ereki ga Cristo'ga momanouka pe mbopiro'yavo pendekote'varuhua hugwi tapojyka ti ġa jijive javo. Nurā ti peko katu Tupana'ga mboheteavo.

Cristo'gareheve'ġa nembirekoa

7 ¹ Pekwatija pe mbatera imbuhuruka ji ve ikwehe. Takwahavuka ti ji kiro pe me a'ero imombe'ukatuavo ikwatija imondouvouka pe me.

Pyry tuhē akwaimbae'ġa pe kunhangwera'ġa nderekoe'ymame novia.

² Emo jara'ġa ojipe'ġa nembireko'ġa potarahivuhu ġa nderekovo. Nurā ji ei reki pe me: Tahembireko po akwaimbae'ġa kunhangwera'ġa pavēi a'ero, a'e ji. A'ero po ġa ġwembireko'ġa jate gwereko hamo.

³ Ġwembirekorame nahā po ġa toko a'ero hamo. Hēa ġwembireko'ga potarame togwereco po ga hēa hamo. Na jitehe ga ġwembirekohēa potarame po hēa togwereco ga hamo. ⁴ Ġwembirekorame po hēa ga rerekoi okovo garemimbotarimova'ea rehe hamo. Na jitehe po ga hēa rerekoi okovo hēaremimbotarimova'ea rehe hamo. Tokoyme ti ġa ġwemimbotarimova'ea rehe jate. ⁵ Hembirekove'ġa ti te'iyme ojohupe a'ero ndorogwerekoi ji nde kiro javo. Emo ojipea ji amombe'u kiro pe me. Po ti pe pe'e na'ē ojohupe: “Xanhi'inhi'i ti Tupana'ga pe. Nurā xajogwerekoyme kiro.” Pe erame a'ea, a'ea rupi jate ko pyry pejogwerekoe'yma. A'ereki ojikwe pe pe'e na'ē: “Ndiajogwerekoi kiro xanhi'inhi'i ti Tupana'ga pe javo,” pe'e na'ē pe ojohupe. Tapekombegwei ti pejogwerecoa'java, a'e ji pe me. Pe ndekombegwerame po ti Satanás'ga ei pe me nehē: “Pereko ti ojipe'ġa a'ero,” e po ti ga pe me nehē. Penhimomiraname'ymame po ti kotihī pe ojipe'ġa potarahivuhui a'ero Satanás'ga nhi'ġa rupi pejikovo nehē. Nurā ji ei pe me: Tapekombegwei ti penhimbireko'a'java a'ero.

⁶ Ji nda'ei reki kiro: Ahe nhaporemō ti tahembireko a'ero. Nahā ji ei: Ahe hambirekopotarame ti pyry ahe rembirekoro a'ero nehē. ⁷ Ji ve reki

koji'i pyry ji javijitehe ã nahembirekoi ã potare'yma. Emo Tupana'ga nhande mbokarakatu pa. Jara'ãga Tupana'ga ã mbokarakatu toko katu ti ã ã gwembirekoe'yma javo. Jara'ãga ga ã mbokarakatu tahembireko katu ti ã javo.

⁸Kiro ji ei a'ero hembirekoe'ÿve'ãga pe aherembirekokwera'ãga pe no. Pyry ãga pe ãga ndekorame gwembirekoe'ymano ji javijitehe. ⁹Emo ãga nhimomiraname'ymane ãga potarahivuhuavo tahembireko ti ãga ãga pavêi a'ero. A'ereki nanongara'ãga gwembirekoe'ymane ãga potarahivuhuhetei novã. Koji'i pyry nanongara'ãga nembirekoro a'ero.

¹⁰Kiro ji ei hembirekove'ãga pe kunhangwera'ãga pe topohiryme ti ãga gwembireko'ãga hugwi. A'ea ko nhinhi'ãga jate rui. A'ea ko nhandepojykaharete'ga ei ãga pe no. ¹¹Kunhangwera'ãga pohirame gwembireko'ãga hugwi ji ei ãga pe togwerekokatua'ja ti ãga gwembireko'ãga jitehe. Gwembireko'ãga nderekoa'jave'ymane tahembirekoyme ti ãga ojipe'ãga pavêi. Akwaimbae'ãga pe ji ei no topohiryme ti ãga gwembireko'ãga hugwi, a'e ji nhandepojykaharete'ga nhi'ãga mombe'gwovo.

¹²Jara'ãga pe ji ei kiro. Tupana'ga nhi'ãga ji namombe'ui kiro ãga pe. Jihã a'e ãga pe. Po Cristo'gareheve'ga rembirekohã ndojikogi Cristo'ga rehe. Po hã pohipotare'ymane ga hugwi topohiryme ti ga hã hugwi a'ero. ¹³Na jitehe ji ei no: Po Cristo'garehevehã rembireko'ga ndojikogi Cristo'ga rehe. Po ga pohipotare'ymane hã hugwi topohiryme ti hã ga hugwi a'ero. ¹⁴A'ereki ga Tupana'gareheve'ãga'jave'ga ga rekoro gwaramo gwembirekohã pavêi Cristo'garehevehã pavêi. Na jitehe kiroki hã ndojikogi Cristo'ga rehe – hã ko Tupana'gareheve'ãga'javehã hã rekoro gwaramo gwembireko'ga pavêi Cristo'gareheve'ga pavêi. Po na rui hamo, a'ero po gãnda'yra'ãga Tupana'gareheve'ãgarũive'ãga ja hamo. Gãnda'yra'ãga ko Tupana'gareheve'ãga'jave'ãga tuhẽ reki.

¹⁵Tupana'ga e'i ojiheve'ãga pe nhaporemõ: “Pejogwereko katu ti,” ei ga. Kiroki ãga ndojikogi Cristo'ga rehe – ãga pohipotaramẽ gwembireko'ãga hugwi Cristo'gareheve'ãga hugwi, na ãga pohiri ãga hugwi a'ero. Naname ko Cristo'gareheve'ãga piro'yro ãga hugwi a'ero. ¹⁶A'e reki ji kunhangwera'ãga pe: Mara'ngu po ti nde enhimbireko'ga mbojikoguka Cristo'ga rehe nehẽ? Igwete ji ei akwaimbae'ãga pe: Mara'ngu po ti nde enhimbirekohã mbojikoguka Cristo'ga rehe jitehe nehẽ no?

Nahã ti peko Tupana'ga remimo'ãa rupi

¹⁷Põ nahã pendekoagwera Tupana'ga pe mo'ẽrame ojive ikwehe nahã jitehe ti peko a'ero kiro. A'ereki nahã nhandepojykaharete'ga pe mongo pe mbokarakatuavo. A'ea ji ei pe me. A'ea jitehe ji ei Cristo'gareheve'ãga pe nhaporemõ jihorame Tupana'ga mbohetehava pype ãga mbo'embo'ẽrame jipi. ¹⁸Judeus'ãga okytiuka gwa'yra'ãga nakwanhapi'ria ãga pita'ngirame. Po judeusramo pe ndekoi Tupana'ga pemo'ẽrame ojive tapeavykyi ti ika'ãgwera a'ero tiukwahavyme ti javo. Po judeus'ãgarũiva'ero pe ndekoi Tupana'ga pemo'ẽrame

tapekytiukari ti ģa pe penhakwanhapira. ¹⁹Na ģa ndekoi jate ojikytiukare'ymame. Na jitehe na ģa ndekoi jate ojikytiukarame. A'ereki nanongara rehe rūi Tupana'ga oko. Ģa onhi'ipo'rurame a'ea rehe Tupana'ga reko.

²⁰A'e ji pe me a'ero: Po nahã pe ndekoi Tupana'ga pemo'ërame nahã jitehe ti peko. ²¹Tupana'ga pemo'ërame ojive po pe poravykytehei ojipe'ga pe pejipiro'yangave'yima penhimboporavykyve'ga hugwi. Tapevy'aruhui ti a'ea rehe. Nandejate ti peko a'ero pejiporavykyavo ga pe. A'erorame tehe ga pe mbopiro'ypotaramame ojihugwi, pejirokwa ti a'ero pejiġwovo ga hugwi. ²²Kiroki ģa ndipiro'y'i ojipe'ġa hugwi nhandepojykaharete'ga omo'ërame – ģa ipiro'y' reki okote'varuhua hugwi. A'ereki nhandepojykaharete'ga ģa mbopiro'y' jugwi ģa mongovo ġwemimbotarimova'ea rehe. Kiroki ģa ipiro'y' ojipe'ġa hugwi Cristo'ga omo'ërame – ģa ndipiro'y'i reki Cristo'ga hugwi. A'ereki ga ģa mongo ġwemimbotarimova'ea rehe. ²³Tupana'ga omomanouka Cristo'ga pe ndepyga ikwehe tapojyka ti ģa jijive javo. Peko ti garemimbotarimova'ea rehe a'ero. Tapekoi ti ojipe'ġa nemimbotarimova'ea rehe a'ero okote'varuhuve'ga nemimbotarimova'ea rehe. ²⁴Nhiirũ, a'ea'ja ji pe me: Po nahã pe ndekoi Tupana'ga pemo'ërame ikwehe, nahã ti peko jitehe pejikoty'a Tupana'ga pavẽi.

Hembirekoe'ÿve'ġa

²⁵Ikwatijarame ji ve pe ei ikwehe: “Marã re po hembirekoe'ÿve'ġa ndekoi a'ero hamo kunhangwera'ġa?” pe'e pe ikwehe. Kiro ji imombe'ui pe me a'ero. Nhandepojykaharete'ga nde'i reki ji ve a'ea rehe. Jihi a'e a'ero imombe'ġwovo pe me. A'ereki nhandepojykaharete'ga omombyry ji ve. Nurã po ahe ojiko ji rehe. ²⁶A'ero ji ei kiro pe me: Mbatera rahyaġwama ġwaramo pyry akwaimbae'ġa ndekoi jitehe okoagwera rehe. ²⁷Enhimbirekojiperame ti terei a'ero tapohi ti hã hugwi javo. Enhimbirekoe'ymame ti terei tanhirembireko ti kiro javo. ²⁸Emo enhimbirekorame nde nderekote'varuhui. Hembirekoe'ÿvehã na jitehe ġwembirekorame po ti hã ndokote'varuhui a'ero. Emo penembirekorame koji'i po ti pe ikwahavi hahya nehẽ pejikovo avo yvya koty nehẽ. Nda potari ji hahya pe me novã. Nurã ji ei pe me: Pyry pe napenembirekoi ġa potaruhue'yima.

²⁹Nhiirũ, nokombegwei po ti Cristo'ga ura'java mbapava koty nehẽ, a'e ji pe me. Nurã ji ei akwaimbae'ġa pe hembirekove'ġa pe a'ero toko po ġa hembirekoe'ÿve'ġa'java'ero hamo. A'ereki hembirekoe'ÿve'ġa ndokoi aġwamova'ea rehe. A'ereki a'ea kotihĩ momina. Ģa ja po hembirekove'ġa ndekoi a'ero hamo, a'e ji pe me. ³⁰Kiroki ģa ojehe'o hete kiro – toko po ģa ojehe'oe'ÿve'ġa javijitehe hamo. Kiroki ģa ojai hete kiro – toko po ģa ijaje'ÿve'ġa javijitehe hamo. Kiroki ģa opyhyppyhy mbatera kiro – toko po ģa ģa ja hamo – kiroki ģa okoe'yima mbatera rehe nhandeapoa rūi reki javo jupe. ³¹Kiroki ģa opo'ru yvyakotyva'ea – toko po ģa ģa ja hamo – kiroki ģa ndokoi yvyakotyva'ea rehe jate. A'ereki yvya aġwamova'ea mominaġwama nhande hugwi.

³²Apota ji pepiro'ya nhaġatarahiva'ea hugwi. Akwaimbae'ġa hembirekoe'ÿve'ġa oko hete Tupana'ga rehe tonhimohẽ Tupana'ga ji rehe javo. ³³Hembirekove'ġa ki

a'e te oko hete vyvakotyva'ea rehe no tonhimohẽ nhirembirekohẽa ji rehe javo.

³⁴Mokõi ãa'agatarã a'ero. Oko potã ãa Tupana'ga rehe novĩa. Emo ãa oko potã ãgwembireko'ãa ndehe no. Nanongara ko ndapyryhetei a'ero.

Kunhangwera'ãa na jitehe hambirekoe'y'vẽ'ãa aherembirekokwera'ãa no. Oko hete ãa Tupana'ga rehe tako pa ti garemimbotarimova'ea rehe javo. Hambirekove'ãa ki a'e te oko hete vyvakotyva'ea rehe no tonhimohẽ nhirembireko'ga ji rehe javo.

³⁵A'e ji a'ea pe me topopoko ti ji javo. Ji nda'epotari pe me: “Na rui peko. Na rui peko.” Nda'ei ji a'ea. Toko katu ti ãa javo ji ei pe me. Peko hete ti Tupana'ga remimbotarimova'ea rehe pejeaporoãitakaturo nehẽ, a'e ji pe me.

³⁶Po ojipe'ga ei ãgwembirekoruamahẽa pe: “Xajogwerekoyme ti.” Emo po aerẽ ga ei oyvyteri pe: “Ndapyryvi reki a'ea hẽa pe,” e po ga. “Apotarahi ji hẽa no. Areko potã ji hehã a'ero hamo,” e po ga. Tahembireko tuhẽ ti ga hẽa pavẽi a'ero ãgwemimbotarimo. Ndokote'varuhui reki ga ãgwembirekorame hẽa pavẽi.

³⁷Ojipe'ga po e'i oyvyteri pe: “Ndarekoi tuhẽ ti ji nhinhimbirekoruamahẽa pavẽi,” e po ga. Ojipe'ãa rui e'i ga pe. Ga tuhẽ e'i ojive ãgwemimbotarimo. Ndotarahivuhui po ga hẽa no. Pyry po ga nahembirekoi hẽa pavẽi a'ero hamo. ³⁸Nahã a'ero. Kiroki ga hambireko kunhangwerahẽa pavẽi – pyry tuhẽ ga hẽa rerekoi a'ero. Kiroki ga nahembirekoi kunhangwerahẽa pavẽi – koji'i pyry reki garekoa a'ero.

³⁹Hambirekovehẽa po nahembirekoa'javi ojipe'ga pavẽi hamo hẽarembireko'ga manoe'ymame hamo. Ahe manorame hẽa piro'yro ahe hugwi. A'ero po pyry hẽa rembirekoro ojipe'ga pavẽi ãgwemimbotarimo. Jesus Cristo'gareheve'ga jate po hẽa gwereko hamo. ⁴⁰Emo koji'i hẽa roryvamo ãgwembirekoa'jave'ymame. Jihi reki a'e a'ea pe me. Tupana'ga ra'uva po ji mbo'e a'ea rehe no.

Ikwava'eãipyra ha'angava pe

8 ¹Tamombe'u kiro pe me mbiara ikwava'eãipyra ha'angava pe ãgwemimbohetehara pe. “Mara'ngu po opyryvamo Tupana'ga pe nhande i'urame a'ea?” pe'e pe ji ve ikwatija ikwehe. Pepyteripeve'ãa e'i reki: “Nhande nhaporemõ tikwaha mbatera,” ei ãa. A'iti nhande tikwaha, a'e ji. Emo nhande ikwahavame mbatera xanhimbohete potã reki. Hovai jate nhandenhoarõheterame nhande nhombojikogi Cristo'ga rehe. ²Kiroki ãa e'i tehe ojive akwaha ji mbatera javo – ãa ndokwahakatui ve a'ero. ³Hovai jate kiroki ãa oarõ hete Tupana'ga – Tupana'ga okwaha hete ãa ojihe ãa ndekoheterame.

⁴Tamombe'u kiro a'ero mbiara ikwava'eãipyra ha'angava pe. Tikwaha nhande ãanemimbohetehara. A'ea ko ha'angavatehea reki a. Tupana'ga jate oko Tupanamo. Jara ndogwerekoi. Tikwaha nhande a'ea. ⁵Ojipe'ãa e'i: “Gwereco tupana yvagi pe vyva koty onhimongyavo yvaga jara pavẽi,” ei ãa. ãa pe po gwereko a'ea. ⁶Nhande ve ki a'e te gwereco ojipejive'ga jate Tupana'ga nhandervete'ga. Gaha oapopavuka mbatera hako. Ga rehe nhande rekoi xako

ti garemimbotarimova'ea rehe javo. Ojipeji jate ko nhandepojykaharete'ga Jesus Cristo'ga. Gaha oapo pa mbatera hako. Tupana'ga oapopavuka ga pe. Gaha nhandereaporoğita mbopyahu nhande rerekovo no.

⁷Jararamo nhande tikwaha a'ea. Jara'ğa ki a'e te ndokwahavi a'ea. A'ereki ға ojipokwaha ha'angava mbohetea rehe Tupana'garũiva'ea mbohetea rehe ojikoga renonde Jesus'ga rehe. Ağwamo ki a'e te Jesus'gareheva'ero ға ei ha'angavatehea jupe novĩa. Emo ojipokwahava ғwaramo ға ei jitehe kiro mbiara pe ikwava'eğipyra pe: "A'ea ko Tupana'garũiva'ea apoa." A'ero i'urame po ға ei oyvyteri pe: "Mara'ngu po Tupana'ga nharõ'yma ahe i'urame? Anhimbote'varuhu po ji a'ea uro ғwaramo," e po ға oyvyteri pe. A'ereki ға ndokwahakatui ve. ⁸Tupana'ga nde'i nhande ve nhande i'urame. Ga nde'i jitehe nhande i'ue'ymame. A'ereki nianemombyryvi i'urame. I'ue'ymame nianembote'varuhui no. A'ea ға ndokwahakatui ve.

⁹A'e reki ji pe me a'ero: Tapemongote'varuhui ti ға. Pehe pe'e: "Nanhimbote'varuhui ji i'upavame mbatera," pe'e pe. Emo ojipe'ğa ndokwahavi ve a'ea. A'ero po ға ei: "Cristo'gareheva'ero nhande nhimbote'varuhui nhande jupavame mbatera," e po ға. Tapemongote'varuhui ti ға a'ero i'gwovouka ға pe. ¹⁰Po nde i'ui Tupana'garũiva'ea ronga pype, a'ero po ga nde repiagi. A'ero po ga ei: "Ga okwaha hete mbatera. Igwete ga i'ui reki Tupana'garũiva'ea rupiara," e po ga nde mombe'gwovo. "Ga javijitehe ti ta'u no," e po ga. A'ero po ga i'ui a. Emo ga pe po ndapyryvi ga i'urame. A'ereki oyvyteri pe ga etehei: "Jesus'gareheva'ero ji nhimbote'varuhui ji i'urame Tupana'garũiva'ea rupiara," e'i tehe ga. ¹¹Ga ndokwahakatui ve. Nde ki a'e te erekwaha nhanerembi'ua nianhimbote'varuhui reki javo. Nerembikwahava reki ғamongote'varuhuağwama nde i'urame ғandovaki. ¹²Ga ko neirũ'ga. Ga repyga Cristo'ga omano no tamombo ti garekote'varuhua javo. Nde ereko te'varuhu enhirũ'ga pe i'gwovouka ga pe pyryve'ymame ga pe. Nahã nde ereko te'varuhu Cristo'ga pe no. ¹³Nurã ji ei: Po ti nhirembi'ua nhiirũ'ga mongote'varuhui nehẽ, a'ero po ti ji nda'uağwami mbiara tamongote'varuhuyme ti ga javo ғwaramo.

Paulova'ea onhimombe'u Jesus'ga moirũharamo

9 ¹Jipiro'y ko ji ojipe'ğa hugwi. Ji ko Jesus Cristo'ga moirũharamo ako. A'ereki ji ahepia ga ikwehe nhandepojykaharete'ga. Ji ve ga pe mbojikoguka ojihe ikwehe. ²Ojipe'ğa po e'i ji ve Jesus'ga moirũhara'ga rüi. Pe ki a'e te pe'e ji ve Jesus'ga moirũhara'ga tuhẽ. Jukwaha reki a'ea. A'ereki pehe ko nhiremimbojikohara. A'ereki ji ve nhandepojykaharete'ga onhimoirũuka nahã pe mbojikoguka ojihe.

³Ojipe'ğa e'i tehe ji ve: "Po Jesus'ga moirũharamo nde rekoi hamo, a'ero po na rüi nde rekoi hamo," e'i tehe ға ji ve. Nahã ji ei a'ero nhinhimombe'gwovo ға pe: ⁴Jesus'ga moirũharamo ore Jesus'ga mombe'umbe'ui ojipe'ğa pe. A'ero po pyry tuhẽ orerenduhara'ğa imbuhuri mbatera ore ve ikwepykavamo hamo novĩa. ⁵Jesus'ga moirũharamo jara'ğa nembirekoro Jesus'gareheve'ğa pavẽi. Jesus'ga

reki'yra'ğa ko na, Pedro'ga no. Ğa ğwembireko'ğa nderohorame ojupi ojipe'ğa imondoi mbatera ğa pe no. Po ore rembirekoro Jesus'gareheve'ğa pavēi hamo, a'ero po pyry ore ğa nderohoi ore rupi hamo novia. ⁶Jesus'ga moirūharamo jara'ğa Jesus'ga mombe'urame ğanenduhara'ğa omondo mbatera ğa pe toporavykyyme ti ğa ojipea rehe mbatera pyhyga javo. Ore po na jitehe no hamo jilhi Barnabé'ga pavēi. Pyry po ore ndoroporavykyi ojipea rehe mbatera pyhyga orojive hamo novia. A'reki ore na jitehe Jesus'ga mombe'umbe'u ojipe'ğa pe jipi novia.

⁷Soldados'ğa tavukarame ğanduvihava'ğa omondo mbatera ğa pe. Ğa ndoporavykyi ojipea rehe no tipyhy ti mbatera nhandejive javo. Ğanduvihava'ğa omondo ğa pe. Oro ityhara'ğa no. Ğa o'u yva'ia ğwemitymagwera oporavykyagwera rehe. Na jitehe oporavykyagwera rehe ovelhas repiakatuhara'ğa o'u ika'mbya ovelhas hugwi.

⁸Nanongara pe nhande epavi yvyakotyva'ero. Nhande jate rūi reki xa'e. A'reki Tupana'ga okwatijaruka nanongara Moisésva'ea pe hako. ⁹A'ea ikwatijarame Moisésva'ea ei a'ero:

“Tapembojurutyvukari yuranuhūa a'ea ipyrūpyruğame ipi'rogame japea ha'ynha hugwi.

Na i'ui oporavykyro ğwaramo,” ei ahe ikwatijarame ğwemimbo'eagwera hako.

Gara pe ikwatijara i'ei? Yuranuhūa rehe jate Tupana'ga ağataramo ikwatijarukarame naerū? ¹⁰Ore repyga jate rūi Tupana'ga ei naerū? Ore repyga tuhē reki Tupana'ga ei ikwatijaruka hako togwereko ti ğa mbatera javo hako. Nurā ore Jesus'ga mombe'urame po orerenduhara'ğa tombuhu mbatera ore ve hamo. Ore ko ityhara'ğa'java'ea. Hyvykoirame ityma renonde po ityhara'ğa ei hamo: “Aerē po ti ji i'ui kohoa pora nehē,” e po ğa hamo. Ğahā no – kiroki ğa onupanupā ipi'roga japea ha'ynha hugwi. Ipi'rogame po ğa ei aerē ti ta'u nehē javo hamo. ¹¹Ore na jitehe no a'ero. Ore Jesus'ga mombe'umbe'urame pe me po tiruahū pe me pe imbuhurame mbatera ore ve naerū? Pyry tuhē reki pe imbuhuri ore ve novia. ¹²Po pyry ojipe'ğa ei pe me mbatera rehe, ore kaitu po pyry ore ei pe me hamo novia.

A'erorame tehe ore ndoro'ei reki pe me pembuhu ti mbatera ore ve javo. Po ore ei pe me mbatera rehe, a'ero po ojipe'ğa ete'varuhui ore ve ore Cristo'ga mombe'urame. “Mbatera rehe jate ğa Cristo'ga mombe'ui ore ve,” e po ğa. “Nurā ore norohendupotara'javi gamombe'ua,” e po ğa ore mombe'ute'varuhuavo. Nurā ore ndoro'ei pe me mbatera rehe jipi. Oronhimomirana ore hahyparavuhua pe orokovo jipi timombigyme ti pyryva'ea mombe'ua javo ğwaramo.

¹³Oro ğa – kiroki ğa oporavyky judeus'ğa jatykahavuhua pype – ğa o'u pevova'ea ojipe'ğa nembikwava'eğa jipi. Ğa inoğame mbiara ikwava'ehava rehe tikwava'ē Tupana'ga pe javo ğa opojyka mo ojive. Pekwaha pe a'ea. ¹⁴A'ea'java'ea pe nhandepojykaharete'ga e'i ore ve no: “Kiroki ğa omombe'u katu pyryva'ea jipi – ğanenduhara'ğa po omondo mbatera ğa pe a'ea rehe hamo,” ei ga.

¹⁵Pyry po pe imbhuri mbatera ji ve Jesus'ga mombe'ua rehe hamo novia. Emo ji ndapoykai mbatera pe hugwi. Ji ikwatjarukarame kiro pe me ji nda'ei: "Tapoyka ti mbatera pe hugwi." Ji ndapoykai tuhẽ reki pe hugwi. Nhimanoa ko koji'i pyry ji ve a'ea hohe. Anhimbohete ji nhirembipoykae'yama rehe. Te'yime ti ga ji ve a'ero: "Paulo'ga onhimbohete tehe reki. A'ereki ga opoyka mbatera ga hugwi," te'yime ti ga ji ve a'ero. ¹⁶Emo pyryva'ea mombe'urame ji nanhimbohetei a'ea rehe jipi. A'ereki Tupana'ga ji mondouka a'ea rehe tuhẽ. "Emombe'u ti Jesus'ga mombe'upyryva," ei ga ji ve ikwehe. Po ji nahendukatui Tupana'ga nhi'iga Jesus'ga mombe'gwove'y, a'ero po ite'varuhu ji ve. ¹⁷⁻¹⁸Po nhiremimbotarimo ji Jesus'ga mombe'umbe'ui jipi, a'ero po pyry ga imbhuri mbatera ji ve hamo. Po nhiremimbotarimo rui Tupana'ga ji mondoukari ga pyri ga mombe'gwovouka ji ve, a'ero po pyry ji ve ji ndapoykai mbatera ojipe'ga hugwi ji Jesus'ga mombe'urame ga pe. A'ero po ji ga mombe'ui ga pe mbatera rehe rui.

Paulova'ea ombojiko pota ahe Jesus'ga rehe

¹⁹Jipiro'y ji ojipe'ga hugwi nhaporemovia. Emo gandeaporoğita rupi nhaporemovia ji nhimondoi reki tambojiko ti koji'live'ga Jesus'ga rehe javo. ²⁰Ji Jesus'ga mombe'urame judeus'ga pe gandeaporoğita rupi ji hoi a'ero tambojiko ti ga Jesus'ga rehe javo. Jipiro'y ji Moises'va'ea remimbo'eagwera hugwi novia. Emo judeus'ga a'ea gwendu katu. A'ero ji ga javijitehe hendukatui no tambojiko ti ga Jesus'ga rehe javo. ²¹Na jitehe Jesus'ga mombe'urame judeus'garuive'ga pe gandeaporoğita rupi ji hoi no tambojiko ti ga Jesus'ga rehe javo. Ga ndogwerekoi Moises'va'ea remimbo'eagwera. Nurã jirekorame gapyteri pe ji ndakoi hehe no. Ji nda'ei reki: Ji ndakoi Tupana'ga nhi'iga rehe. A'ea rui ji a'e. A'ereki ji ako tuhẽ Cristo'ga nhi'iga rupi. ²²Jirekorame gapyteri pe – kiroki ga ndokwahakatui ojikogame Jesus'ga rehe – ikwahakatu'e'yve'ga'java'ero ji rekoji tambojiko hete ti ga Jesus'ga rehe javo. Jihojihorame ojipe'ga pyteri pe ga javijitehe ji rekoji a'ero nahã ti tambojiko jara'ga mo Jesus'ga rehe javo. ²³Nahã ji rekorekoji gapyteri pe a'ero tokwaha pa ti ga Jesus'ga mombe'ua. Akwahavuka ji Jesus'ga ga pe Tupana'ga ti tomomyry ga pe javo. A'ereki imomyryvame ga pe ga omomyry ji ve no.

²⁴Penembikwahava pe kiro ji ei pe me. Ga nhağanhaname ji ppy ti tavahẽ javo, he'yjuhuve'ga onha novia. Emo ojipejive'ga jate ga ppy ovahẽ. Ga pe ga imondoi pyryva'ea a'ero ikwepykavamo. Ga javijitehe ti pejirokwa pejikokatuheteavo Tupana'ga ti tomomyry ji ve a'ero nehẽ javo. ²⁵Kiroki ga onha hete tapyhy ti pyryva'ea javo – ojikwe ga nhağanhahetei jipi onhimboitavo tanhağatu kwaha ti javo. Nhande ki a'e te xako katu katu hete jipi xako katu kwaha ti javo. Kiroki ga onha hete pyryva'ea rehe – pyrygwerehuva'ea rehe reki ga ndekoi novia ka'atehea apopyra rehe oakağareheva'ea rehe. Emo a'ea kotihĩ opa ga hugwi. Nhande ki a'e te pyryheteva'ea rehe nhande rekoji avuiramava'ea rehe. A'ereki nhanderuvağwama Tupana'ga pyri namomini. ²⁶Onhaname ga hokatui tavahẽ tuhẽ ti javo. Na jitehe ji rekokatui tavahẽ tuhẽ ti Tupana'ga pyri javo.

Ojipe'gã o kwaokwaramame ojogwehe gã opoa mondokatui toho ti jipoa ga rehei katu javo. Na jitehe ji rekokatui taho ti Tupana'ga rehei katu javo.

²⁷Amombe'umbe'u ji ojipe'gã pe jipi: “Peko katu ti Jesus'ga remimbotarimova'ea rehe. A'ero po ti Tupana'ga imombyryvi pe me nehê,” a'e ji gã pe jipi. Jihi na jitehe ako katu a'ea rehe no Tupana'ga ti tomombyry ji ve javo. Ji nanhimongoukari nhiremimbotarimova'ea rehe a'ero, te'iyime ti ga ji ve: “Namombyryva'javi reki ji nde ve.”

Tapembohetei Tupana'garüiva'ea

10 ¹Nhiirũ, tapekwahava'ja ti nhaneramonhava'ea rekoagwera Moisésva'eareheva'ea rekoagwera. Ohorame Egitopeva'ea gwyrã hugwi ahe oho pa yvağatiğã gwyrã hako – kiroki yvağatiğã ahererohohava hako. Oho pa katu ahe yvya pikağã rupi ypihua pytera rupi o'yahava. ²Ohorame yvağatiğã gwyrã ahe nhimboukwahapavi Moisésva'eareheva'ero ohorame yvya pikağã rupi ypihua pytera rupi. ³Ahe nhaporemõ o'u manã – a'ea Tupana'ga ombuhuruka ahe ve yvaga hugwi aherembi'uramo. ⁴Ahe nhaporemõ o'u yhya no – kiroki Tupana'ga ombuhuruka ahe ve toy'u pa ti gã javo. A'ereki Tupana'ga ombuhuruka yhya ahe ve itauhã hugwi. Cristo'ga pe ji ei reki ita mombe'gwovo. A'ereki Cristo'ga ombuhuruka yhya ahe ve ogwovo ahe rupi. ⁵Nahã Tupana'ga imombyryhetei ahe ve novã. Emo ahe rekouhurame ite'varuhuva'ea rehe onhimongyavo ga nhimonha'ngahetei ahere'yjuhã rehe ahe apitiuka ahera'oa momboruka ongae'yï me hako.

⁶Ahemombe'upyra nhande momoranduvi nhande moğitavo. Ahe ja rüi ti xako a'ero. Tipotaruhyme ti ite'varuhuva'ea. ⁷Ahere'yjuhã ombohete ha'angava Tupana'garüiva'ea no hako. Tupana'ga rembikwatijarukara ahe mombe'u javo: “O'uo'u gã oina toryva apovo.

A'ero gã pyi o'ama Tupana'garüiva'ea mboheteavo,” e'i ikwatijara ahe mombe'gwovo hako.

Ahe ja rüi ti xako a'ero. Timboheteyme ti ha'angava Tupana'garüiva'ea.

⁸Ahere'yjuhã gwereko ojipeva'ea rembirekova'ea hako. Nurã ahe manoi ara rupi ve vinte e três milve'gã onhimongyavo. A'ereki Tupana'ga oapitiuka ahe hako. Ahe ja rüi ti xako a'ero. Tirekoyme ti ojipe'gã nembireko'gã.

⁹Ahere'yjuhã ombokwerajahi nhandepojykaharete'ga onhiroyrõyromo jipi hako. Nurã ga mboja mondomondoi ahe ve ahe hu'uuka ahe apitiuka hako. Ahe ja rüi ti xako a'ero. Timbokwerajahivyme ti nhandepojykaharete'ga monhimonha'ngavo.

¹⁰Ahere'yjuhã e'ie'i te'varuhu onhiroyrõyromo jipi hako. Nurã Tupana'ga ahe apitiukari ojipyryve'ga pe. Ahe ja rüi ti xako a'ero. Xa'ete'varuhyme ti nhanenhiroyrõ'e'yma.

¹¹Nahanahã ahe rekoi hako. A'ea koi ojipe'gã momorandu. Igwete Tupana'ga ikwatijarukari aherekoagwera mombe'gwovouka a'ea ti

tapemoḡita javo nhande ve. Tapekote'varuhui ti a'ero. A'ereki momina ḡwerĩ yvy yvzareheva'ea reheve nhande hugwi.

¹²Tape'ei ti pejive: “Jijikohetero ḡwaramo Cristo'ga rehe po ti ji ndakote'varuhua'javi nehẽ,” tape'ei ti. Mara'ngu po ti pe kotihĩ pejikote'varuhua'java nehẽ? Penhimboko'i ti. Pejapyaka katu ti tapekote'varuhua'javyme ti a'ero. ¹³Pekwaha pe mbatera rahya jipi. Nanongara jithehe reki ojipe'ḡa okwaha no. Emo po ti Tupana'ga oho ḡwembi'ea rupi pe pokoga jipi. Ga nomondoahivuhuukari hahyheteuhuva'ea pe me. Hahyrame pe me po ti ga pe mbopopoakari hehe nehẽ. Ga po ti pe mbo'e nehẽ nahã ti peko javo nehẽ. A'ero po ti pe nhimomiranambavi hahya pe nehẽ.

¹⁴Nhiirũ, tapembohetei'i'i ti ha'angava Tupana'garũiva'ea. ¹⁵Pekwaha hete pe mbatera, a'e ji pe me. Penhimombaragwaha hete ti a'itituhẽva'ea rehe a'ero kiro ji nhi'iḡame pe me. ¹⁶Amoamome nhande i'ui vinho pão raygwe'roga reheve xajapyaka kiro Cristo'ga manoagwera rehe javo. Nhande i'urame vinho copopyeva'ea nhande ei Tupana'ga pe: “Ndepyry hete nde Cristo'ga rekoa reka'vogauka ga momanomouka ore ve,” xa'e nhande ga pe. Nhande i'urame vinho copopyeva'ea nhande jogwerekoi nhanenhimbojikoty'a Cristo'ga pavẽi garekoa rerekovo. Nhande i'urame pão nhanerembihaygwe'roga nhande jogwerekoi nhanenhimbojikoty'a Cristo'ga pavẽi Cristo'ga ra'oa rerekovo. ¹⁷Nhandere'yjuhu nhande novĩa. Emo nhande xajogwerekoi pa nhandejikoty'a Cristo'ga pavẽi ojipejiva'ero. A'ereki nhande nhaporemõ ti'u akoja jithehe pão ojipejiva'ea.

¹⁸Pehepia ti judeus'ḡa ndekoagwera no. Gweru ḡa mbiara jipi imondovouka Tupana'ga pe ikwava'ẽhava rehe. Aerẽ ḡa i'ui mo. I'urame Tupana'gapeva'ea ḡa jogwerekoi ojikoty'a Tupana'ga pavẽi. ¹⁹Oro Tupana'garũiva'eapeva'ea, marãi ji jupe a'ero? Oko tehe reki Tupana'garũiva'ea, a'e ji, ḡanembikwava'eḡa pavẽi – kiroki ikwava'embyra Tupana'garũiva'ea pe. ²⁰Imondorame mbatera jupe ikwava'ẽhava rehe Tupana'ga pe rũi ḡa imondoi. Omondo ḡa Diabo'gapyriva'ea pe reki anhaḡa pe, a'e ji. Ndapotari ji pejikoty'ara Diabo'gapyriva'ea pavẽi. ²¹Pe'u pe copopyeva'ea nhandepojykaharete'gapeva'ea. Tape'ui po pe copopyeva'ea Diabo'gapyriva'eapeva'ea no hamo. Pe'u pe mbatera ikwava'embyra nhandepojykaharete'ga pe. Tape'ui po pe mbatera ikwava'embyra Diabo'gapyriva'ea pe no hamo. ²²I'urame a'eapeva'ea po ti nhande nhandepojykaharete'ga monhimboahivuhui nhandejive nehẽ. A'ero po ti ga imbohahyukari nhande ve nehẽ. A'ereki ga ipopoakaruhu hete nhande hohe pa.

Ji rupi jithehe ti peho, ei ahe

²³Pe'ji po pe: “Cristo'gareheva'ero ḡwaramo nhande ndikwakuva'javi. A'ero ji rekoi nhiremimbotarimova'ea rehe,” pe'ji po pe. Na tuhẽ nhande ndikwakuva'javi novĩa. Emo amoamome ndapyryvi reki ojipe'ḡa pe nhande rekorame nhaneremimbotarimova'ea rehe. Amoamome nhanderekorame nhaneremimbotarimova'ea rehe nhande ndipokopokogi

reki ojipe'ğa Cristo'gareheve'ğa. ²⁴Nhandejive jate rui po nhande imombyryvi hamo. Timombyry po nhande ojipe'ğa pe hamo no.

²⁵Nahã ti peko a'ero. Pe'u pa ti mbiara ipyhygame ima'ehai pe. Tape'ei ti ğa pe: "Pemombe'u ti ji ve. Omondo jipe ğa agwa Tupana'garũiva'ea pe ikwava'ehava rehe inoğa? Marã a'ero?" Tape'ei ti a'ea ğa pe. Pe'u pa ti jave'yima. Tapemongotehei ti pejipy'a mbatera rehe i'gwovo a'ero. ²⁶A'ereki Tupana'ga mombe'uhava e'i:

"Yvya ko nhandepojykaharete'ga apoa yvyakotyva'eareheva'ea nhaporemno," e'i ikwatijara imombe'gwovo.

Pyry tuhẽ nhande i'ui garembiapo a'ero.

²⁷Po Cristo'gareheve'garũive'ga ei pe me: "Pejijo i'gwovo ji pyri," e po ga. Pehopotarame ti peho ga pyri a'ero i'gwovo. Pe'u pa ti garemimbuhura. Tape'ei ti ga pe: "Marã? Eremondo jipe nde agwa Tupana'garũiva'ea pe ikwava'eğa inoğa?" Tape'ei a'ea ga pe. Pe'u pa ti imongoteheeyma pejipy'a hehe i'gwovo pa ga pyri. ²⁸Hovai jate po ojipe'ga ei pe me: "Okwava'ẽ ğa agwa Tupana'garũiva'ea pe." Po ga erame a'ea pe me tape'ui ti a'ero penhağataruhuramo ga rehe – kiroki ga omombe'u pe me. A'ereki oyvyteri pe ga e'i jupe: "Po Cristo'gareheve'ğa ndo'ui nanongara hamo," ei ga. ²⁹Pe me ko pyry pe i'ui novia. Emo ga pe ndapyryvi i'ua. Nurã tape'ui a'ero.

Pe'e po pe ji ve a'ero: "Marã naerũ? Jipiro'y ji jijkwakuva hugwi i'gwovo pa mbatera. Maraname ji nda'ui naerũ ğa eteherame jupe ahe ndo'ui javo?" pe'e po pe ji ve. ³⁰"Turame jipi ji ei Tupana'ga pe: 'Ndepyry hete nde imbuhuruka mbatera ji ve,' a'e ji ga pe," pe'e po pe ji ve. "Maranuhurame ğa ete'varuhui ji ve nhirembi'ua rehe ji ekaturame Tupana'ga pe i'gwovo naerũ?" pe'e po pe ji ve.

³¹Nahã a'ero, a'e ji. Peko katu ti mbatera urame mbatera aporame no pejikovo katu pa. A'ero po ti ojipe'ğa pe ndepiagame Tupana'ga mbohetei nehẽ. "Ndepyry hete nde ğa mongokatuavo," e po ti ğa Tupana'ga pe a'ero pe mombe'gwovo nehẽ. ³²Peko katu ti a'ero. Tapemongote'varuhui ti judeus'ğa. Tapemongote'varuhui ti judeus'garũive'ğa no. Tupana'gareheve'ğa ti tapemongote'varuhui Jesus'gareheve'ğa. ³³Ji rupi jitehe ti peko katu a'ero. Ji tamonhimoheureka pa ojipe'ğa jijihe jipi. Namombyrypotari ji jijive jate. Ğa pe nhaporemno ji imombyrypotari jipi tojiko ti ğa Jesus'ga rehe javo.

11 ¹Cristo'ga rupi jitehe ji hoi. Na jitehe ti peho ji rupi.

Kunhangwera'ğa ndekoa ğa jatykarame

²Pyry hete pe napemoka'nhyimi jipi jirekoagwera pejipyri. Peho pe nhiremimbo'ea rupi no. A'ereki Cristo'gareheve'ğa nemimombe'ua rehe ji pe mbo'ei.

³Takwahavuka ti a'ero pe me. Cristo'ga ko huvihava'ga akwaimbae'ğa pe. Akwaimbae'ğa ko huvihava'ğa ğwembireko'ğa pe. Tupana'ga ko huvihava'ga Cristo'ga pe. ⁴Ndapyryvi a'ero akwaimbae'ğa nhakağahovi onhi'igame Tupana'ga pe ğandovaki Tupana'ga mombe'urame ojipe'ğa pe no. Onhakağahovame po ğa imbote'varuhui Cristo'ga pe ga ko jiruvihava'ga rui javo.

⁵Emo kunhangwera'ğa nhakağahove'ymame ndapyryvi ға nhi'iğame Tupana'ga pe ғандovaki ға Tupana'ga mombe'urame ojipe'ğa pe no. Onhakağahove'ymame po ға ei: “Nhirembireko'ga ko huvihava rüi ji ve,” e po ға. Nanongara'ğa ko ға ja – kiroki ға, ojipe'ğa opı ға'ava ға hugwi tipoyjaryme ti ға javo. ⁶Onhakağahove'ymame po ға tokyti pa o'ava a'ero hamo. Po ға ndopotari opoyjayjare'ymamo oapina rehe, a'ero po ға tonhakağaho hamo. Tonhakağaho po ға onhi'iğame Tupana'ga pe ғандovaki ga mombe'urame no hamo.

⁷Akwaimbae'ğa po nonhakağahovi hamo. A'ereki Tupana'ga oapo akwaimbae'ğa oji'java'ero. Ғandeaporoğita Tupana'ga reaporoğita ja. Kunhangwera'ğa ki a'e te ғandeaporoğita akwaimbae'ğa ndeaporoğita ja. ⁸Tupana'ga ndoapoi reki akwaimba'eva'ea kunhangwerava'ea ra'oa pyvõ. Ga oapo kunhangwerava'ea akwaimba'eva'ea nharukağa pyvõ hako. ⁹Na jitehe Tupana'ga ndoapoi akwaimba'eva'ea kunhangwerava'ea pe. Ga oapo kunhangwerava'ea akwaimba'eva'ea pe topoko ti hëa ga javo hako. ¹⁰A'ero po kunhangwera'ğa tuhë e'i onhakağahova pe hamo yvagipeve'ğa nembiepiaga ғwaramo. ¹¹Ojikoty'aro ғwaramo nhandepojykaharete'ga pavëi ға jikogi ojogwehe jipi kunhangwera'ğa akwaimbae'ğa pavëi. ¹²A'ereki ymya Tupana'ga oapo kunhangwerava'ea akwaimba'eva'ea nharukağa pyvõ. Nahã kunhangwerava'ea ohë akwaimba'eva'ea hugwi. Emo kiro akwaimbae'ğa o'a kunhangwera'ğa hugwi. Tupana'ga reki oapopavuka okovo.

¹³Pehe ti penhimombaragwaha hehe. Pyry pe me kunhangwera'ğa nhi'iğame Tupana'ga pe ғандovaki ға nhakağahove'ymame naerü? Ahã, a'e ji. ¹⁴Pekwaha pe pejiyvyteri pe akwaimbae'ğa avukuhua ғambopoyjayjare'yma. ¹⁵Kunhangwera'ğa avukuhua ki a'e te ғambokatua rupiara. A'ereki Tupana'ga omondo a'ea ға pe toakağaho'i ti ға a'ea pyvõ javo. ¹⁶Momina nhinh'iğa a'ea rehe a'ero. Po ojipe'ğa ji rayvapotari ға'akağahova rehe, a'ero po ji ei ға pe: Na tuhë ore rekoi. Nahã jara'ğa ndekoi no Cristo'gareheve'ğa ojatykarame Tupana'ga mboheteavo.

Ahe o'u ikwahava'java Cristo'ga manoagwera

¹⁷Kiro pe mbo'erame po ti ji nopombohetei nehë. Anhi'iğahy po ti ji pe me nehë. A'ereki pe jatykarame Tupana'ga mboheteavo a'ea ko pendekokatuağwama rüi reki. Peko te'varuhu reki pe. ¹⁸Tanhi'i na'ë pe me pejogwayvara rehe a'ero. A'ereki ojipe'ğa omombe'u a'ea ji ve. “Corintopeve'ğa ojatykarame ға jogwayvayvari jipi. Ғa ndojihe'akatui,” ei ға pe mombe'gwovo ji ve. Arovia gwere ji ғanhi'iğa. ¹⁹Tupana'ga po e'i a'ero: “Na ға jogwayvari tomboukwaha ti okokatuve'ğa a'ero.” ²⁰Pejatykarame pe ei: “Ti'u ti nhandejapyakavo nhandepojykaharete'ga rehe,” pe'e tehe pe jipi. Emo reki pe ndapekoi ga rehe pejikote'varuhuro ғwaramo i'urame. ²¹Pejihe reki pe peko. A'ereki i'urame jararamo pe pe'u jipe ima'ëa renonde. Jara'ğa ndogwerekoi reki. Nurã ko ty'ara jara'ğa jukai. Jara'ğa ki a'e te heagwryr vinho i'uhetero ғwaramo. ²²Ndaperekoi tuhë po pe onga naerü tape'u ipype? Ndapekoaljavi po pe Tupana'gareheve'ğa ndehe naerü imbatere'ÿve'ğa

mbopoyjayjare'yma naerũ? Marãi po ti ji a'ero pe me nehẽ naerũ? Opombohete po ti ji a'ea rehe naerũ? Nopombohetei tuhẽ po ti pe a'ero nehẽ.

²³ Amombe'u ko ji pe me nhandepojykaharete'ga remimbo'eagwera ikwehe – a'ea ga omombe'uuka ji ve. Nahã a'ero. Omania renonde Jesus'ga rekoĩ ġwemimbo'ehara'ġa pavẽi ppytunimo ikwehe. Judasva'ea omondouka ġwerĩ ga guardas'ġa po pe tojuka ti ġa ga javo. A'ea renonde Jesus'ga ipyhygi pão. ²⁴ Igwete ga ei Tupana'ga pe: “Ndepyry hete nde imbuhua ore ve,” ei Jesus'ga javo ga pe. Igwete ga haygwe'rogwe'rogi imondovo ġwemimbo'ehara'ġa pe. “A'ea ko jira'oa, a'e ji jupe,” ei ga ġa pe. “Pe'u kiro. A'ereki jira'oa ji anhiwawa'ẽ kiro pe ndepykaramo nhimanorame,” ei ga. “Aerẽ ti pe'ua'jaa'ja pão a'ero tanhimoka'nhymyme ti,” ei Jesus'ga ġwemimbo'ehara'ġa pe ikwehe.

²⁵ Na jitehe ġa i'urẽ mbatera Jesus'ga ipyhygi copo vinho ryrua. Igwete ga imondoi ġa pe javo. “Pe'u kiro copopyeva'ea,” ei ga. Igwete ga imombe'ui gwekoa ġa pe. “Aheka'voguka po ti ji jirekoa ġa pe jijjukauka nehẽ,” ei ga. “Nahã po ti ji manoi vyakotyve'ġa ndepyga. A'ereki Tupana'ga e'i ipyahuva'ea imombe'gwovo. 'Garekoa reka'vogame po ti ji imombori ġandekote'varuhua ġa hugwi,' ei Tupana'ga,” ei ga. “Nurã jirekoa reka'voga ġwaramo a'iti hete tuhẽ po ti Tupana'ga imombori he'yjuhuve'ġa ndekote'varuhua ġa hugwi nehẽ ġwembi'ea rupi,” ei Jesus'ga ġa pe. “Pe'u ti a'ero vinho copopyeva'ea. Pe i'ua'jaa'javame ji kwahava'ja a'ero nehẽ,” ei Jesus'ga ġwemimbo'ehara'ġa pe. ²⁶ A'ea ko Jesus'ga nhi'iġagwera ikwehe. Igwete ji ei pe me: Garura'java renonde nahã po ti pe i'ua'jaa'javi pão copopyeva'ea reheve. I'ua nanani po ti pe ikwahavukari ojipe'ġa pe gamanoagwera nehẽ.

²⁷ Peko katu ti a'ero i'urame pão copopyeva'ea reheve Cristo'ga manoagwera herekokatuavo. Kiroki ga oko te'varuhu i'gwovo – ga ombotegwete Cristo'ga ra'oa garekoa reheve, ga ombotegwete gamanoagwera a'ero. ²⁸ Nurã ti pekwaha na'ẽ pejeaporoġita i'ua renonde. Pendeaporoġita pyryvame ti pe'u pão copopyeva'ea reheve herekokatuavo a'ero nehẽ. ²⁹⁻³⁰ Pepyteripeve'ġa ki a'e te nonhimombaragwahavi nhandepojykaharete'ga manoagwera rehe ġa i'urame pão copopyeva'ea reheve. Nanongara'ġa pe Tupana'ga ombohahyuka a'ero. Nurã pepyteripeve'ġa tetirũaramo opopoakare'yma onhimongyavo. Jara'ġa omano no. ³¹ Po ti nhande ikwahavi nhandeaporoġitapyryva na'ẽ i'ua renonde, a'ero po ti ga nombahyukari nhande ve nehẽ. ³² Imbohahyukarame nhande ve ga nhande mbo'ei nhanderekote'varuhua rehe tomombi ti ġa a'ea javo. Ga nhande mbo'ei te'iyme ti ga nhanderekote'varuhua pe o'erame oarõel'ýve'ġa pe nehẽ ġa mondovo hahyva'ea ruvihava pype nehẽ.

³³ Nhiirũ, pejatykarame i'gwovo Cristo'ga manoagwera kwahava'java tape'una'ẽi ti a'ero. Pe'ji ti pejohupe: “Na ti ġa ndupavi na'ẽ,” pe'ji ti. ³⁴ Tape'una'ẽi ti mbatera Tupana'ga ti tombohahyukaryme pe me. Po ti ty'ara jara'ġa jukahetei, a'ero po ti ġa ġwonga pe na'ẽ i'ui mo hamo. Jihorame pe pyri po ti ji pe mbo'ei jara rehe pe nderekovo nehẽ.

Tupana'ga ra'uva ahe mbokarakatu

12 ¹Nhiirū, tamombe'u ti kiro pe me Tupana'ga ra'uva remimbuhura Cristo'gareheve'ġa pe. A'ereki a'ea rehe pe ikwatijari ji ve ikwehe. A'ea ji tamombe'u katu kiro pe me tapekwaha hete ti javo. ²Pekwaha pe pejikoagwera. Pe ndapejikogi Cristo'ga rehe ikwehe. Nurā ġa pe mbopogwepogweuhui ġwemimbotarimova'ea rupi imboheteuka pe me ha'angava Tupana'garūiva'ea okojirūiva'ea. ³A'ero ji takwahavuka kiro pe me Tupana'ga ra'uva remimbo'ea. Tupana'ga ra'uva ombo'erame ġa nombotegwetei Jesus'ga a'ero. Tupana'ga ra'uva ombo'erame jate reki ġa ei: “Jesus'ga ko orepojkaharetero oko,” ei ġa.

⁴Tupana'ga ra'uva ombuhu paravuhu nhandekarakatua. Gara'uva jitehe reki ombuhu pa nhande ve nhande nanenani. ⁵Nhandeporavyky ojoatyatyvi ojohugwi novīa. Emo Jesus'ga pe jitehe nhande xaporavyky nhandekovo. ⁶Nhandekarakatua ojoatyatyvi ojohugwi novīa. Emo Tupana'ga jitehe nhande mbokarakatu pa nhande rerekovo.

⁷Tupana'ga gwepiuka gwa'uva remimbuhura nhande nanenani topoko pa ti ġa ojipe'ġa javo. ⁸Nahā Tupana'ga ra'uva nhande mbokarakatu pa. Ojipe'ga pe gara'uva omombe'uuka Tupana'ga rembikwahava. Tupana'ga ra'uva jitehe ombo'euka ojipe'ga pe a'itituhēva'ea kwahava rehe. ⁹Gara'uva jitehe ombojiko hete ojipe'ga Tupana'ga rehe. A'ea jitehe omombiguka ojipe'ga pe ġatetirūa ġa hugwi. ¹⁰A'ea jitehe oapouka ahemonhimomby'ava'ea ojipe'ga pe. Ojipe'ga pe a'ea omombe'uuka Tupana'ga nhi'iġa. Tupana'ga ra'uva omombaragwahavuka ojipe'ga pe ġwemimbokarakatua. A'ero ga ikwahavi javo Tupana'ga ra'uva ġa mbokarakaturame. Ga ikwahavi javo Tupana'ga ra'uvarūiva'ea ġa mbokarakaturame. Tupana'ga ra'uva ombokarakatu ojipe'ga monhi'iparavuhuavo. A'ero ko ganhi'iġa yvyakotyve'ġa nembikwahave'ŷva'ea. Ojipe'ga pe Tupana'ga ra'uva okwahavuka akoja'ga nhi'iġa imombe'ukatuavouka nhanerembikwahave'ŷva'ea tokwaha pa ti ġa javo. ¹¹Tupana'ga ra'uva jitehe ombokarakatu pa ġa a'ero. A'ea jate ombokarakatu paravuhu ġa naġanani ġwemimbotarimo okovo.

He'yi nhandera'oareheva'ea

¹²Ta'e ti kiro nhandera'oa'java'ea mombe'gwovo. Ojipeji ahera'oa rekoi novīa. Emo ahera'oa gwereko he'yiva'ea ojihe: ahetīa, ahepoti'a, ahepy'a no. Ahera'oareheva'ea nhaporemō ojihe'a reki ojogwehe onhimongovo ojipejiva'ero ahera'oro. Na jitehe nhande re'yi-ro Cristo'gareheva'ero nhanenhimongyavo novīa. Emo nhande nhaporemō xako ojipejiva'ea'java'ero Cristo'ga pavēi. ¹³A'ereki Tupana'ga ra'uva nhande mongo pa ojipejiva'ea'java'ero. Nhande xako paravuhu novīa. Jara'ġa ko judeusramo, jara'ġa judeus'ġarūiva'ero. Jara'ġa oporavyky tehe ojipe'ġa pe opiro'ye'yma ġa hugwi. Jara'ġa oporavyky opiro'yro ojipe'ġa hugwi. Nhande pyri nhaporemō ko Tupana'ga ombuhu gwa'uva jitehe.

¹⁴Pehepia ahera'oa a'ero. Ojipejiva'ea jate rüi ahera'oareheva'ea. He'yiva'ea reki ahera'oa gwereko ojihe. ¹⁵Po ahepya ei: “Ji ko ahepoa rüi. Ji ahera'oareheva'ea rüi reki a'ero.” Ahepya erame a'ea po i'etehei ikwahave'yma javo. A'reki ahepya ko ahera'oareheva'ero tuhê reki oko. ¹⁶Po aheapyakwara ei: “Ji ko ahereakwara rüi. Ji ahera'oareheva'ea rüi reki a'ero.” Aheapyakwara erame a'ea po i'etehei. A'reki aheapyakwara ko ahera'oareheva'ero tuhê reki oko. Na jitehe nhande re'yiro Cristo'gareheva'ero nhandekarakatuparavuhuvavo ojipe'ğa pokoga. Ojipejive'ga jate rüi reki Cristo'gareheva'ero. Po ojipe'ga ei: “Ikarakatu ğa japovo ahemonhimomby'ava'ea. Ji ndajikarakatui japovo a'ea. Ji Cristo'gareheva'ea rüi reki a'ero.” Ga erame a'ea po ga etehei ikwahave'yma. A'reki ga Cristo'gareheva'ero tuhê reki oko.

¹⁷A'ea'ja ji pe me. Pehepia ahera'oa. Po ahereakwara jate hekorame gara pyvõ po ahe henduvi hamo naerü? Po aheapyakwara jate hekorame gara pyvõ po ahe hetuni a'ero hamo naerü? Nahã ji ei Cristo'gareheve'ğa mombe'gwovo a'ero no. Po ahemonhimomby'ava'ea apohara'ğa jate ğa ndekorame ma'ğa po omombe'u Tupana'ga ojipe'ğa pe hamo naerü? ¹⁸⁻²⁰Ahera'oareheva'ea nhaporemõ reki Tupana'ga omongo katu ahera'oa rehe ęwemimbotarimo. Po heheva'ea jate hekorame ojipejiva'ea jate, marã po ahera'oa rekoi a'ero hamo naerü – kiroki a'ea rehe oko heheva'ea? He'yi reki ahera'oareheva'ea. Emo ojipejiva'ea ahera'oa. Na jitehe nhande nanenani Tupana'ga nhande mongoi ojiheva'ero nhande mbokarakatuparavuhuvavo ęwemimbotarimo. Po ojipejive'ga jate ga rekorame Cristo'gareheva'ero marã po nhande xajihe'a ojogwehe Cristo'ga pavêi hamo naerü? Nhandere'yjuhu reki nhande Cristo'gareheva'ero. Emo nhande xako ojipejiva'ea'java'ero Cristo'ga pavêi nhandekarakaturo nhandejopokopokoga.

²¹Ahereakwara nde'i ahepoa pe: “Ji ndajikogi nde rehe,” nde'i jupe. Na jitehe aheakağa nde'i ahepya pe no: “Ji ndajikogi nde rehe,” nde'i jupe. A'reki ahera'oareheva'ea ojiko tuhê ojogwehegwehe. Na jitehe Cristo'gareheve'ğa jikogi ojogwehegwehe no.

²²Jara pe nhandera'oareheva'ea pe nhande ei ipopoakare'yva'ea. Emo xajiko hete reki nhande nanongara rehe. ²³Jara pe nhande ei okoteheva'ea. A'ea nhande imbojigwagi tireko katu ti javo. Jara nhande ndihepiukari ojipe'ğa pe. A'ea rehe nhande timongi katu tapy'ynhapira a'ero tohepiagyme ti ğa javo. ²⁴Kiroki koji'i ikatu nhande ve nhandera'oareheva'ea – a'ea nhande nimbojigwagi a'ero. Tupana'ga tuhê ombojihe'a pa ahera'oareheva'ea tombojigwa hete ti ğa okoteheva'ea javo nhande ve. ²⁵Nahã Tupana'ga imbojihe'akatui ahera'oareheva'ea a'ero tokote'varuhuyme ti heheva'ea ojohupeupe javo. “Ti'ağata pa ti ahera'oareheva'ea ojogwehegwehe,” ei Tupana'ga. Na jitehe Tupana'ga nhande mbojihe'akatui ojipejiva'ea'java'ero tokote'varuhuyme ti Cristo'gareheve'ğa ojohupe javo. “Ti'ağata pa ti ğa ojogwehegwehe ojogwerekokatuavo,” ei Tupana'ga nhande ve. ²⁶Hahyrame ojipejiva'ea pe ahera'oareheva'ea pe hahy jara pe nhaporemõ a'ero. Ğa imombyrvame ojipejiva'ea pe a'ea ko pyry jara pe nhaporemõ no. Na jitehe hahyrame ojipejive'ga pe Cristo'gareheve'ga pe hahy

jara'ğa pe nhaporemo Cristo'gareheve'ğa pe nhaporemo. Ojipe'ğa imombyryvame ojipejive'ga pe Cristo'gareheve'ga pe jara'ğa ndorypavamo ga pavêi a'ero.

²⁷Penhinanhinani peko Cristo'gareheva'ero. Igwete ojipejiva'ero pe jihe'ari ojogwehe Cristo'ga pavêi. ²⁸A'ero pe jatykatykai Tupana'ga mboheteavo. Igwete Tupana'ga pepyteripeve'ğa mo'emoe'i tojopokopoko ti ға javo. Jara'ğa pe ga ei: “Ğa hohe pa po ti pe. Cristo'ga moirûharamo po ti pe peko nehê,” ei ga. Jara'ğa pe ga ei: “Cristo'ga moirûhara'ğa ndehohyva'ero po ti pe peko. Pe po ti nhinhi'iğa mombe'uharamo peko nehê,” ei ga. Jara'ğa pe Tupana'ga ei: “Nhinhi'iğa mombe'uhara'ğa ndehohyva'ero po ti pe peko. Ojipe'ğa mbo'eharamo po ti pe peko nehê tapemongo ti ға Cristo'ga nhi'iğa rupi,” ei ga ға pe. Jara'ğa pe Tupana'ga ei: “Pe po ti peapo ahemonhimomby'ava'ea nehê.” Jara'ğa pe ga ei: “Pe po ti pemombiguka ojipe'ğa tetirûa ға hugwi nehê.” Jara'ğa pe ga ei: “Pe po ti ojipe'ğa pokopoko imbatere'ÿve'ğa nehê ipopoakare'ÿve'ğa nehê no.” Jara'ğa pe Tupana'ga ei: “Pe po ti ojipe'ğa moğitai ға mondomondovo.” Jara'ğa pe ga ei: “Opombokarakatu po ti ji pe monhi'iparavuhavavo nehê. Penhi'iğa po ti vvyakotyve'ğa nembikwahave'ÿva'ea a'ero nehê,” ei Tupana'ga ға pe.

²⁹Ğa nhaporemo rûi reki Cristo'ga moirûhara'ğa a'ero. Ğa nhaporemo rûi Tupana'ga nhi'iğa mombe'uhara'ğa. Ğa nhaporemo rûi ғambo'ehara'ğa. Ğa nhaporemo rûi oapo ahemonhimomby'ava'ea. ³⁰Ğa nhaporemo rûi Tupana'ga ға mbokarakatui imombigauka ға pe ojipe'ğa tetirûa ға hugwi. Ğa nhaporemo rûi Tupana'ga ға monhi'iği imongovo ғanhi'iğa nhanerembikwahave'ÿva'ero. Ğa pe nhaporemo rûi Tupana'ga imombe'ukwahavukari ғanhi'iğa nhanerembikwahave'ÿva'ea. ³¹Pepota tuhê ti pejive a'ero Tupana'ga ra'uva remimbuhura a'ea remimbokarakatua – kiroki koji'i pyryva'ea ojipea hohe.

Igwete ji kiro imombe'una'ei pe me penemiarôhetea tapendeaporoğita katu ti javo. A'ereki koji'i pyry hete tuhê nhande ojipe'ğa arô hete a.

Tiarô hete nhande ojipe'ğa

13 ¹Po nhande nhi'iği hajiheve'ğa nhi'iğimo yvagipeve'ğa nhi'iğimo no. Po nhande niarôi ahe nhanenhi'iğame ғanhi'iğimo, a'ero po nhande nhi'itehei reki imotininiuhûva'ea ja hahyahivuhuva'ea ja.

²Po Tupana'ga nhande mbokarakatui imombe'gwovouka onhi'iğa. Po nhande niarôi ahe imombe'urame, a'ero po nhande rekotehei reki.

Po nhande ikwahapavi mbatera ikwahava Tupana'ga rembikwahava onhimiva'ea. Po nhande niarôi ahe nhande ikwahapavame mbatera, a'ero po nhande rekotehei reki.

Nhande jikohetero ғwaramo Tupana'ga rehe po ga nhande pokogi vvytyruhua mbojipe'auka nhande ve nhande erame jupe pepe'a javo. Po nhande niarôi ahe nhandejikoheterame Tupana'ga rehe nahâ javo, a'ero po nhande rekotehei reki.

³Po nhande ima'ema'embavi nhanembatera imbatere'ÿve'ğa pe. Po nhande niarôi ahe nhande ima'embavame, a'ero po nhande ima'etehei. Nhaneremima'embava nomombyryvi reki nhande ve.

Po ġa ei nhande ve: “Pe pohire'yma ġwaramo Cristo'ga hugwi po ti ore imbokaipavi penda'oa nehē,” e po ġa nhande ve. Nhandepohipotare'ymame ga hugwi po nhande ikwawa'eġi nhandera'oa ġa pe a'ero tombokai ti ġa javo. Po nhande niarōi ahe nhanenhikwawa'eġame ġa pe, a'ero po nhande nhikwawa'ētehei reki. Nhanenhikwawa'eġa nomombryvi reki nhande ve.

⁴Nhande ojipe'ġa arōheterame nhande nianhimonha'ngajipei ġa ndehe jipi. Timombyry nhande ġa pe. Nhande ojipe'ġa arōheterame nhande nianhimyrōi ġa ndehe. Nianhimbohetei nhande ji ko ġa hohe jave'yma. ⁵Ġa arōheterame nhande xako katu tuhē ġa pe. Nhandejihe jate rūi nhande xako. Nhande nianhimboahivi ġa pe. Nhande ndikwahava'ja'javi ojipe'ġa ndekote'varuhua nhandejive. ⁶Ġa arōheterame nhande nianderoryvi ġandekote'varuhua rehe. Ġandekokatua rehe nhande roryroryvamo. ⁷Ġa arōheterame nhande xanhimomirana jipi ġa ndekote'varuhurame nhandejive. Tiarō hete nhande avuirama. “Aerē po ti pyryvamo nehē,” xa'e nhande jipi. Nhande xajiko ojipe'ġa ndehe jipi. Xanhimomirana nhande jipi a'ero.

⁸Ġa arōheterame nhande niarombigi tuhē ġa. Opi po ti nhandekarakatua nehē Tupana'ga remimbuhura. Tupana'ga nhi'iġa mombe'ua po ti opi. Ġanhi'iġa po ti opi no nhanerembikwahave'ỹva'ea. Mbatera kwahava po ti opi nehē no. ⁹Aġwamo ndikwahapavi nhande. Nhande nimombe'ukwahapavi Tupana'ga nhi'iġa no. ¹⁰Tupana'ga ki a'e te okwaha pa. Cristo'ga rurame po ti opa nhanerembikwahapave'yma nehē.

¹¹Jivoja'irame ji ndakwahapavi ikwehe. Tayri'ġa ja ji nhi'iġi a'ero ikwehe. Ndajireaporoġitakatui ji no. Nanhimombaragwahakatui ji mbatera rehe no jivoja'iro ġwaramo ikwehe. Aerē jiyvuakarama ji pohiri tayri'ġa ndeaporoġita'java'ea hugwi.

¹²Hepiagame espelho pyvō nhande ndihepiakatuhetei. A'reki nhandera'angava tehe nhande tihepia. Na jitehe aġwamo nhande ndikwahahetei Tupana'ga repiagelymame. Aerē po ti nhande a'ea ga repiakatui ga kwahava nehē. Ojogwovavo po ti nhande jogwepiagi Tupana'ga pavēi. Aġwamo nhande ndikwahapavi ga. Ga ki a'e te nhande kwaha hete pa. Na jitehe po ti nhande ga kwahahetei nhandekovo ga pyri nehē no.

¹³Nahā hekoi avuiramava'ea a'ero:

Xajiko nhande Tupana'ga rehe.

Tikwaha nhande pyryvaġwama.

Tiarō hete nhande ojipe'ġa.

Pyry Tupana'ga pe nhande jikogame ga rehe.

Pyry nhande ikwahavame pyryvaġwama no.

Johe'i tehe reki pyry Tupana'ga pe nhanderemiarōhetea.

Ĝanhi'iĝa nhanerembikwahave'ŷva'ea

14 ¹Pejirokwa ti ojipe'ĝa arōheteavo a'ero. Pepota ti Tupana'ga ra'uva remimbuhura penhimbokarakatua. Pepota ti pejikarakatua Tupana'ga nhi'iĝa mombe'ua rehe kaitu.

²Tupana'ga ra'uva ombokarakatu ojipe'ĝa monhi'iĝa. A'ero ĝanhi'iĝa nhanerembikwahave'ymaĝwama. Nahā onhi'iĝame ĝa nhi'iĝi Tupana'ga pe a'ero. Nhande ve rūi reki ĝa onhi'i. A'ereki nhande ndikwahavi nanongara ĝanhi'iĝa.

³Emo kiroki ĝa omombe'u Tupana'ga nhi'iĝa ikwahavuka ojipe'ĝa pe – ĝa onhi'i nhande ve tuhē. A'ero ĝa nhande mbojikoheteukari Jesus'ga rehe. Onoĝatu ĝa nhandepy'a no. ⁴Kiroki ĝa ĝanhi'iĝa reki nhanerembikwahave'ŷva'ero – ĝa onhimbojiko hete Tupana'ga rehe. Ĝa ki a'e te – kiroki ĝa omombe'u Tupana'ga nhi'iĝa – ĝa ombojikoguka pa Jesus'gareheve'ĝa ga rehe a'ero.

⁵Apota po ji pe napenani penhi'iĝa hekorame nhanerembikwahave'ŷva'ero novia. Koji'i reki ji apota penemimombe'ua Tupana'ga nhi'iĝa rehe. Nanongara'ĝa nemimombe'ua koji'i pyry ojipe'ĝa nhi'iĝa hohe nhanerembikwahave'ŷva'ea hohe, a'e ji. A'ereki ĝa omombe'u katu Tupana'ga nhi'iĝa. Kiroki ĝanhi'iĝa ikwahavipyre'ŷva'ea – a'ea nhande ndikwahavi. Ojipe'ĝa ikwahavukarame ĝanhi'iĝa nhande ve a'ea ko pyry jitehe no. A'ero ĝa Jesus'gareheve'ĝa mbojikohetei Jesus'ga rehe imombe'urame ĝa pe.

⁶Nhiirū, po ti nhinhi'iĝa nhanerembikwahave'ŷva'ea ji horame pe pyri nehē, a'ero po ti ji ndopopokogi tuhē nehē. Po ti ji imombe'ui pe me Tupana'ga rembikwahavukara ikwahavuka mbatera pe me, a'ero po ti ji pe pokogi nehē. Po ti ji imombe'ui Tupana'ga nhi'iĝa pe me pe mbo'eavo a'itituhēva'ea rehe, a'ero po ti ji pe pokogi nehē no.

⁷Ehepia ko imonhi'ingava jiru'a'java'ea violāo no heporoĝitae'ŷva'ea. Inhi'iĝatue'yname po nhande niambaragwahavi inhimby'ya rehe. ⁸Opy ĝa trombeta soldados'ĝa momoranduva tapetavuka ti ĝa pe kiro javo. Po trombeta nonhi'iĝatui ikwahavukare'yma ĝa pe, a'ero po ti soldados'ĝa nonhimboavujikweri tuhē otavukara rehe.

⁹Na jitehe po ti penhi'iĝa oko aherembikwahave'ŷva'ero, a'ero po ti ĝa ndokwahavi pe nhi'iĝame ĝa pe a'ero nehē. “Onhi'i tehe po ĝa upa,” e po ti ĝa pe me nehē. ¹⁰Gwereko paravuhu hete po vyvakotyve'ĝa nhi'iĝa ojoatytyviva'ea. Ojogwe'yja'ĝa okwaha reki onhonhi'inhi'iĝa. ¹¹Emo ji ikwahave'yname ojipe'ga nhi'iĝa ga ko hajiheva'ea ji ve. Ji hajiheva'ea ga pe no.

¹²Oro pe, pe nhi'iĝame ojipe'ĝa pe tokwaha ti ĝa penhi'iĝa. Pepota pe Tupana'ga ra'uva remimbuhura penhimbokarakatua pejikovo. Pepota hete ti a'ero penhimbokarakatua – kiroki a'ea nhaporemo Jesus'gareheve'ĝa mbojikohetei Jesus'ga rehe.

¹³Nurā ji ei pe me: Ĝanhi'iĝa rekorame nhanerembikwahave'ŷva'ero te'i ti ĝa Tupana'ga pe a'ero: “Nhibokarakatua'ja ti. A'ero po ti ji imombe'ukatui nhinhi'iĝa ĝa pe nehē tokwaha ti ĝa javo,” te'i ti ĝa Tupana'ga pe. ¹⁴Nhinhi'iĝa

rekorame nhanerembikwahave'ýva'ero nhinhi'iğame Tupana'ga pe, jihi anhi'í. Emo nhiakağa ndokwahavi a'ea. ¹⁵Marã po ti ji rekoi a'ero nehẽ naerũ? Anhi'í po ti ji Tupana'ga pe nhinhi'iğa rekorame nhanerembikwahave'ýva'ero. Anhi'í po ti ji ga pe nhiakağa ikwahavame nehẽ no. Na jitehe po ti ji nhimby'yi nhinhimby'yja rekorame nhanerembikwahave'ýva'ero. Anhimby'yi po ti ji nhiakağa ikwahavame nehẽ no. ¹⁶Pejatyka pe jipi Tupana'ga mboheteavo ndepyrý nde javo ga pe. Po nenhi'iğa rekoi nhanerembikwahave'ýva'ero nde nhi'iğame Tupana'ga pe, a'ero po ti marã ikwahave'ýve'ga ei amém na tuhẽ javo nde nhi'imbavame nehẽ naerũ? A'ereki ga ndokwahavi nde nhi'iğame. ¹⁷Pyry hete po nenhi'iğa Tupana'ga pe ovuhu. Emo nde nerembojikogi ojipe'ga Tupana'ga rehe. A'ereki ga ndokwahavi nde nhi'iğame.

¹⁸Pe hohe pa ji nhi'inhi'iği nhinhi'iğa rekorame nhanerembikwahave'ýva'ea novia. Igwete ji ei Tupana'ga pe: “Pyry hete nde ji mbokarakatui a'ea rehe jipi,” a'e ji ga pe. ¹⁹Emo nhande jatykaramé jipi koji'i pyry ji ve nhinhi'iğa rekoi ikwahavukava'ea tambo'e ti ojipe'ğa a'ea pyvõ. Po xunhi hete ji nhi'iği ğa pe novia. Emo ğa okwaha pa reki. Po ji nhi'inhi'ihetei nhinhi'iğa rekorame nhanerembikwahave'ýva'ero, a'ero po ndapyryvi ğa pe. A'ereki ğa ndokwahavi reki nhirembi'ea.

²⁰Nhiirũ, ipita'ngive'ğa ndokote'varuhukwahavi. Ğa ja ti peko a'ero pejikote'varuhukwahave'yma. Tayri'ğa ndaheaporoğitakatui okovo. Ğa ja rui ti peko a'ero pejeaporoğitarame. Peyvuakara ğwaramo ti tapendeaporoğita katu.

²¹Aherembikwatijara omombe'u Tupana'ga nhi'iğa ga judeus'ğa mombe'urame. Nahã Tupana'ga ei:

“Jireheve'ğa nohendukatui nhinhi'iğa.

Nurã po ti ji hajiheve'ğa mondoukari ğa monhi'iğuka ğa pe tokwaha ti ğa nhiremimbo'ea javo novia,” ei Tupana'ga.

“Hajiheva'ero ğwaramo ko ğanhi'iğa jireheve'ğa nembikwahave'ýva'ea.

Emo ğanhi'iğa vehevi po ti nohendukatuukari jireheve'ğa pe nhiremimbo'ea nehẽ,” ei Tupana'ga judeus'ğa remiendu've'yma imombe'gwovo.

²²Nurã ji ei pe me: Tupana'ga ğanhi'iğa mongo nhanerembikwahave'ýva'ero Jesus'gareheve'ğarũive'ğa ti tokwaha jipopoakara javo. Nhande ki a'e te Jesus'gareheva'ero tikwahavipe gapopoakara. Tupana'ga onhi'iğa omombe'uuka Jesus'gareheve'ğa ti tokwaha javo. Jesus'gareheve'ğarũive'ğa pe ki a'e te Tupana'ga ndokwahavukari a'ea. ²³Pejatyka po pe Tupana'ga mboheteavo jipi. Po ti penhi'iğa nhaporemõ nhanerembikwahave'ýva'ea ikwahave'ýve'ğa ndurame pepyteri pe Jesus'gareheve'ğarũive'ğa ndurame no. A'ero po ti ğa ei nehẽ: “Mbipe hete ğanhi'iğa. Heagwry pa ğa a,” e po ti ğa pe me nehẽ. ²⁴Po ti pe nhaporemõ imombe'umbe'ui Tupana'ga nhi'iğa Jesus'gareheve'ğarũive'ga rurame pepyteri pe ikwahave'ýve'ga rurame no. Henduvame penemimombe'ua po ti ga ei: “Kiro ji ikwahavi jirekote'varuhua. Penhi'iğa nhaporemõ omombe'u katu ji ve Tupana'ga rembi'ea jirekote'varuhua

pe,” e po ti ga nehẽ. ²⁵ Omohẽ po ti ga gweaporoğitate'varuhua oyvyteripeva'ea pendovaki nehẽ. A'ero po ti ga nhova'apyni Tupana'ga mboheteavo ndepyry hete nde javo nehẽ. “Tupana'ga oko tuhẽ pepyteri pe,” e po ti ga pe me nehẽ.

Nahã nhande rekoi nhandejatykaramẽ

²⁶ Marã a'ero, nhiirũ? Pejatykaramẽ jipi Tupana'ga mboheteavo jara'ğa onhimby'yi Tupana'ga pe. Jara'ğa ombõ'e ojipe'ğa. Jara'ğa omombe'u Tupana'ga rembikwahavukara. Jara'ğa nhi'iğa ko penembikwahave'yva'ea. Jara'ğa omombe'u katu akoja'ğa nhi'iğa penembikwahave'yva'ea tokwaha ti ға javo. Na tuhẽ ti peko a'ero pejopokopokoga penhombojikojikoga Tupana'ga rehe. ²⁷ Po ti penembikwahave'yva'ea ғанhi'iğa pe jatykaramẽ mokonha'ğa po ti onhi'i a'ero hamo. Ndahe'yive'ğa trẽsve'ğahoheruive'ğa po ti onhi'i hamo. Ojopy'rupy'ru po ti ға onhi'iğa hamo. A'ero po ti ojipe'ğa imombe'umbe'ui ғанhi'iğa tokwaha ti ға javo hamo. ²⁸ Po ti nimombe'uhavi ғанhi'iğa pe tonhi'iğyme ti ға pendovaki a'ero. Pendovakie'y ti ға tonhi'i Tupana'ga pe okovo.

²⁹ Oro Tupana'ga nhi'iğa mombe'uhara'ğa no. Na mokonha'ğa nhi'iği, trẽsve'ğa po. A'ero po ti jara'ğa japyakai ғанhi'iğa rehe nahanahã javo hamo. ³⁰ Po ti Tupana'ga ikwahavukaramẽ mbatera ojipe'ğa pe ga apygame pepyteri pe, onhi'iğypyve'ğa po ti opi hamo ji py'rovo ti ga omombe'u kiro a'ero javo hamo. ³¹ Pe nhapremo ti pemombe'umbe'u Tupana'ga nhi'iğa a'ero pejopy'rupy'ruavo nhande nhapremo tikwaha ti henduva javo. Tapenhombojiko pa ti Tupana'ga rehe a'ero no. ³² Tupana'ga nhi'iğa mombe'uhara'ğa imombe'upotaramẽ ға imombe'ui. Opipotaramẽ ға pigi no. ³³⁻³⁴ Pejopy'rupy'ruelymame hahyahivamo penhi'iğa. Nanongara rehe Tupana'ga ndokoi. Pejogwerekokatukatua rehe ga rekoi.

Pe jatykaramẽ po kunhangwera'ğa opi hamo Tupana'ga nhi'iğa henduva onhi'iğeyma hamo. Nahã Tupana'gareheve'ğa ndekopavi no ojatykaramẽ ga mboheteavo. Moisésva'ea rembikwatijara e'i jupe no. ³⁵ Ikwahapotaramẽ mbatera po ғwonga pype kunhangwera'ğa ei ғwembireko'ğa pe marã javo hamo. Ndipoyjayjari po kunhangwera'ğa onhi'iğame pe jatykaramẽ Jesus'gareheva'ero hamo.

³⁶ Marã pe ndekouhui naerũ? Peheypyuhu pemombe'u Tupana'ga nhi'iğa raikwehe naerũ? Pe me jate Tupana'ga ombuhuruka onhi'iğa raikwehe naerũ? Ahã reki. ³⁷ Po pepyteripeve'ğa ei ojive: “Jihi ko Tupana'ga nhi'iğa mombe'uhara. Tupana'ga ra'uva ji mbokarakatu ji rerekovo,” e po ға. Nanongara'ğa po onhimombaragwaha nhiremimoğita rehe hamo. E'i po ға ji ve hamo: “Nhandepojykaharete'ga Cristo'ga okwatijaruka Paulo'ga pe nhande moğitauka a'ero,” e po ға ji ve hamo. ³⁸ Ґa ndekoe'ymame nhiremimoğita rehe tapekoi ға ndehe a'ero.

³⁹ Nhiirũ, kiro ji ei pe me a'ero: Pe'ji ti Tupana'ga pe: “Ji mbokarakatu ti. A'ereki ji tamombe'u nenhi'iğa,” pe'ji ti ga pe. Nahã ji ei pe me no: Ojipe'ğa nhi'iğa rekorame nhanerembikwahave'yva'ea tapemombigi ti ғанhi'iğa. ⁴⁰ Pejatykaramẽ ti pejopy'rupy'ru katu pejogwerekokatuaivo.

Tupana'ga ombogwera Cristo'ga

15 ¹Nhiirũ, kiro ji ikwahavukara'javi pe me nhiremimombe'upyryvagwera Cristo'ga mombe'uagwera. Pehendu katu pe nhinhi'iġa ikwehe. Nhiremimombe'ua rehe pe peko hete kiro a'ero pejikoga Cristo'ga rehe. ²Po ti pe heroviahetei nhiremimombe'ua avuirama nehẽ, a'ero po ti Cristo'ga pe nderohoi yvagi pe nehẽ pe mongovouka avuirama nehẽ. Po pe herovia'raġuhũi, a'ero po ti ga napenderohoi nehẽ.

³Nhiremienduvagwera ji amombe'u pe me ikwehe. Koji'i hete po nhande tihendu katu a'ea ojipea hohe hamo. Nhiremimombe'uagwera ko na: Cristo'ga omano raikwehe tamombo ti ġandekote'varuhua ġa hugwi javo raikwehe. Tupana'ga rembikwatijarukara rupi ga manoi. ⁴Igwete ġa gara'oa rerohoi inoġa itaruvihava kwaruhua pype. Mokõi ahe kirirẽ Tupana'ga ga mbogweravi. Ġwembikwatijarukara rupi Tupana'ga ga mbogweravi raikwehe. ⁵Aerẽ Cristo'ga jipiukari Pedro'ga pe. Aerẽ ga jipiukari dozeve'ġa pe no omoirũhara'ġa pe. ⁶Aerẽ ga jipiukari kiro ve he'yjuhuve'ġa pe quinhentosve'ġa pe. He'yjuhuve'ġa nde'yja jararamo ġa ndekoji aġwamo. Jararamo ahe manoi. Ġa nhaporemõ ko gareheve'ġa. ⁷Aerẽ ga jipiukari Tiago'ga pe. Aerẽ ga jipiukari omoirũhara'ġa pe nhaporemõ.

⁸Mbapavamo ga jipiukari ji ve no. Na ja hekoi. Kunhangwera'ġa gwa'yra mbo'ariperame nhande nimboha'uvi. Na jitehe ji jikogame Cristo'ga rehe nhande nimboha'uvi a'ea no. ⁹A'ereki ji ambohahy na'ẽ Tupana'gareheve'ġa pe jirekote'varuhuavo ikwehe. Nurã ji ei jijive kiro: Jara'ġa gwyre'i hete ko ji Cristo'ga moirũhara'ġa gwyre'i hete. Cristo'ga moirũhara'ga po ġa nde'i ji ve hamo novĩa. A'ereki ji ako te'varuhu Tupana'gareheve'ġa pe ikwehe. ¹⁰Emo Tupana'ga omombyry reki ji ve ji mongovo Cristo'ga moirũharamo. Nomombyrytehei reki ga ji ve. A'ereki ji aporavyky hete ga pe Cristo'ga moiruamo jara'ġa hohe pa. Ji tehe rũi reki aporavyky. Tupana'ga imombyryvame ji ve ji mbokarakatui ji mboporavykyavo. ¹¹Nhiremimombe'ua ojo'ja reki ġanemimombe'ua pavẽi. A'ea jitehe pe heroviari a'ero pejikoga Cristo'ga rehe.

Nhanembogwerahava

¹²Xa'e nhande jipi: Tupana'ga ombogwera Cristo'ga gamanoa hugwi heikwehe. Maranuhũrame po pepyteripeve'ġa euhui naerũ Tupana'ga nombogweravi omanove'ġa javo? ¹³Po ga nombogweravi ġa hamo, a'ero po ga nombogweravi Cristo'ga raikwehe hamo. ¹⁴Po ga nombogweravi Cristo'ga hamo, a'ero po ore Cristo'ga mombe'utehei pe me hamo. A'ero po pe jikotehei ga rehe hamo.

¹⁵Nahã no. Po ga nombogweravi Cristo'ga hamo, a'ero po jukwahavamo ore'mbea ore Tupana'ga mombe'urame hamo. A'ereki ore oro'e: “Tupana'ga ombogwera Cristo'ga gamanoa hugwi,” oro'e ore ga mombe'gwovo. Po a'iti

omanove'ġa mbogwerave'ymamo, a'ero po ga nombogweravi Cristo'ga hamo. ¹⁶A'ereki nahã ji a'e: Ġa mbogwerave'ymame po ga nombogweravi Cristo'ga hamo. ¹⁷Po Cristo'ga ndokweravi, a'ero po pe jikotehei ga rehe hamo. A'ero po ga nomombori pendekote'varuhua pe hugwi hamo. ¹⁸Po Cristo'ga ndokweravi hamo, a'ero po Cristo'gareheva'ea hoi hahyva'ea ruvihava pype hamo – kiroki ahe omano jipe. ¹⁹Po nhande ei hamo: “Nhande manoe'ymame jate Cristo'ga imombyryvi nhande ve”, a'ero po nhande poria'iheteramo ġa hohe pa hamo.

²⁰Emo Tupana'ga ombogwera tuhẽ reki Cristo'ga ikwehe. A'ea ko Cristo'gareheva'ea mbogwerahavaġwamamo oko. ²¹Akwaimba'eva'ea rekote'varuhuro ġwaramo nhande manoi reki. Ojipe'ga rekokaturu ġwaramo po ti nhande kwerava'javi nhanemanoa hugwi nehẽ. ²²Nahã ji ei. A'ereki Adãova'ea rymminoru nhandekovo ġwaramo nhande manombavi. Cristo'ga pavẽi nhandekovo ġwaramo po ti nhande kwerapavi a'ero nehẽ.

²³Nahã Tupana'ga ġa mbogweravi a'ero: Cristo'ga na'ẽ ga ga mbogwera. Aerẽ na jitehe Cristo'ga rura'javame po ti Tupana'ga ġa mbogweragweravi nehẽ no Cristo'gareheve'ġa. ²⁴Aerẽ mbapava koty po ti Cristo'ga ikwava'eġi ġwembipojy kahava uva'ga pe nehẽ koro ndeapoa javo Tupana'ga pe nehẽ. Cristo'ga po ti omombi pa na'ẽ Tupana'ga arõe'yve'ġa popoakara tohendu katu pa ti ġa Tupana'ga nhi'iġa javo nehẽ. Kiroki ġa huviha hete yvaga gwyrri pe yvya koty no – ġapopoakara po ti Cristo'ga omombi pa nehẽ. ²⁵A'ereki Tupana'ga e'i nhoġwenonde Cristo'ga pe: “Ndehe ti ġanduvihavamo eko avuirama nehẽ. Tamongo pa ti nearõe'yve'ġa nenhi'iġa rupi,” ei ga Cristo'ga pe.

²⁶Mbapavamo po ti Tupana'ga imombipavi ahemanoa tiruahũheteva'ea nehẽ. ²⁷Tupana'ga rembikwatijarukara e'i hako:

“Tupana'ga omongo pa Cristo'ga nhi'iġa rupi,” e'i.

Jukwaha reki ikwatijara mombe'ua. Tupana'ga imongopavame ga nonhimongoi Cristo'ga nhi'iġa rupi. ²⁸Ihopavame ganhi'iġa rupi a'ero Cristo'ga jitehe Tupana'ga ra'yra'ga po ti onhikwava'ẽ Tupana'ga pe nehẽ Tupana'ga jate ti toko huvihavuhetero avuirama nehẽ.

²⁹Oro ġa – kiroki ġa onhimobatizauka omanova'ea repyga onhimobatizaukare'yva'ea repyga – marã ġa ndekoi nanongara rehe naerũ? Po Tupana'ga nombogweravi ahe hamo, a'ero po ġa nde'i hamo: Xanhimobatizauka ahe repyga nehẽ.

³⁰Oro ore, po Tupana'ga nombogweravi omanove'ġa hamo, a'ero po ore pohiri Cristo'ga hugwi hamo tombolahyyme ti ġa ore ve javo hamo. ³¹Nhiirũ, nane'ymi ġa ji jukapotari novia. Amombe'u ji a'ea pe me. A'ereki ji pe mboheteri nhande jikoty'aro ġwaramo Jesus Cristo'ga rehe nhandepojy kaharete'ga rehe. ³²Imombe'upotarame Tupana'ga nhi'iġa ji ġa ndayvayvari Efesopeve'ġa. Ġa ko ja'gwara ja ji ve, a'e ji. A'ereki ġa onharõ hete tijuka ti ga javo. Po ji ikwahahetei hahya nhimanomo Tupana'ga nanhimbogwerava'javi javo, a'ero po ji ikwahahetei hahya Tupana'ga nhi'iġa mombegwovo hamo. Po Tupana'ga nombogweravi omanove'ġa, a'ero po xako aherembi'ea rupi hamo – kiroki ahe e'i:

“Mara'ngu po ti nhanemanomo ko'emame nehê?

Ti'u hete ti mbatera toryva apovo a'ero.

Ti'u hete ti kağwitiğa no,” ei ahe.

³³Tapenhimoandyandyjukari ti ğa pe.

“Tapekoi ti ğa pavêi jipi – kiroki ğa heaporoğita te'varuhu.

Pe ndekorame ğa pavêi po ti ğa ndupi jitehe pendeaporoğita ihoi a'ero nehê,” e'i ikwatijara.

³⁴Peapyakwapupu ti imombiga pejikote'varuhua. Jararamo pepyteripeve'ğa ndokoi hete Tupana'ga pavêi. A'e ji a'ea pe me tapepoyjayjaryme ti a'ero.

Nhandera'oa ti okwerava'ja

³⁵Jara'ga po e'i: “Marã po ti omanove'ğã mbogwerava? Marã po ti ğanda'oa nehê Jesus'gareheve'ğã nda'oa nehê?” e po ga jawo. ³⁶Nderekwahavihu nde! a'e po ji ga pe. Nde itymame po ha'yinha omano na'ê jipi. Narunhe'ymame nahenhuhi reki mbatera. Na jitehe po ti nhande manoi nhanembogwerava renonde nehê.

³⁷Itymame mbatera po nde neretyi henhuiva'ea. Ha'yinha tehe po nde eretÿ trigo ra'yinha ojipea ra'yinha no. ³⁸Henhunhame Tupana'ga ğwemimbotarimo imondoi ha'oa ha'yinha pe. Ha'yinha hetakwera'ja gwereko gwa'oa a'ero.

³⁹Ojoatytyvi reki ha'oa. Yvyakotyve'ğã gwereko gwa'oa. Mbiara gwereko ojipea gwa'oa. Gwyrã'ia gwereko ojipea gwa'oa. Pira gwereko ojipea gwa'oa nohõ.

⁴⁰Gwereko yvagipeva'ea ra'oa. Gwereko yvyakotyva'ea ra'oa nohõ. Ojoatyvi reki yvagipeva'ea katua yvyakotyva'ea katua pavêi. ⁴¹Kwara gwereko okatua. Jahya katua ojipea. Jaytata'ia katua ojipea no. Ojoatytyvi reki jaytata'ia katua ojohugwi no.

⁴²Nahã po ti nhande mbogweravame a'ero nehê. Otymame nhandera'oa ijugamo. Ombogweravame po ti nhandera'oa ndijugi nehê. ⁴³Otymame nhandera'oa ite'varuhuro. Ombogweravame po ti nhandera'oa ikatuheteramo nehê. Otymame nhandera'oa ndipopoakari. Ombogweravame po ti ipopoakaramo nehê. ⁴⁴Otymame nhandera'oa yvyakotyva'ea. Ombogweravame nhandera'oa po ti Tupana'ga ra'uva remimongopyra nehê. Gwereko nhandera'oa yvyakotyva'ea. Nurã ji ei: Gwereko nhandera'oağwama no. A'ea Tupana'ga ra'uva omongo nhande ve.

⁴⁵Nahã Tupana'ga rembikwatijarukara i'ei no:

“Tupana'ga omongo jypyve'ga Adão'ga,” e'i ikwatijara hako.

Aerêve'ga Adão'ga nhande mongo nhande mboheaporoğitapyahuavo. Cristo'ga pe ji ei. A'ereki gaha nhande mboheaporoğita pyahu gwa'uvimo. ⁴⁶Jypya ko nhande rekoi yvyakotyva'ero. Aerê nhande reaporoğitapyahuro nhandekovo.

⁴⁷Tupana'ga oapo jypyva'ea Adãova'ea yja pyvõ. Ahe ko yvyakotyva'ea a'ero. Aerêve'ga ko yvagahugwive'ga Cristo'ga. ⁴⁸Yvyakotyve'ğã ko oho Adãova'ea rupi yjapyvõva'ea rupi. Cristo'gareheve'ğã ko oho Cristo'ga rupi yvagahugwive'ga rupi. ⁴⁹Nhandera'oa ko yjapyvõva'ea ra'oa ja kiro Adãova'ea ra'oa ja. Aerê po ti nhandera'oa yvagahugwive'ga ra'oa ja Cristo'ga ra'oa ja nehê.

⁵⁰Nhiirũ, amombe'u katu ji pe me. Yvyakotyve'ġa nda'oa nhande herekorame po ti nhande ndiahoi yvagi pe nehẽ – perope Tupana'ga oko huvihavuhhetero. Ijuva'ea ndokoaġwami ijuge'ỹva'ero.

⁵¹⁻⁵²Pehendu ti kiro ji imombe'urame aherembikwahavipyre'yma. Jararamo po ti nhande niamanoi ve Cristo'ga rura'java renonde nehẽ. Emo po ti Tupana'ga nhande mbojirojijyipavi nehẽ trombeta nhi'ĩgame mbapavamo nehẽ. Trombeta nhi'ĩgame po ti Tupana'ga ġa mbogweravi na'ẽ omanove'ġa Cristo'gareheve'ġa. Nomanoa'javi po ti ġa a'ero nehẽ. Kotihĩ hete po ti Tupana'ga nhande mbojirojijyi a'ero nehẽ.

⁵³Yvyakotyva'ero nhandera'oa omano ojugamo. Nurã po ti Tupana'ga imbuhuri hajiheva'ea nhande ve nehẽ. A'ea po ti nomanoi ojuge'yma nehẽ. ⁵⁴Imbuhurukarame omanoe'ỹva'ea nhande ve po ti ihoi Tupana'ga rembikwatijarukara japiavo nehẽ – kiroki e'i:

“Ndogwerekoa'javi kiro ahemanoa.

Tupana'ga omombi pa a'ea kiro,” e'i.

Irũa aherembikwatijara e'i:

⁵⁵“Nhanemanoa niandepojykapava'javi.

Nhanemanoa nombohahya'javi nhande ve,” e'i aherembikwatijara.

⁵⁶Nhanemanoa ombohahy nhande ve nhande rekote'varuhuro ġwaramo. Nhanderekote'varuhua ipopoaka nhande rehe nhande ikwahava ġwaramo Moisésva'ea remimbo'eagwera. A'ereki a'ea e'i nhande ve: “Kiroki ġa oko te'varuhu – ġa po ti omano ogwovo hahyva'ea ruvihava pype nehẽ,” e'i aheremimbo'eagwera. ⁵⁷Emo Tupana'ga ombuhuruka avo Jesus Cristo'ga nhandepojykaharete'ga. Igwete ga manoi nhande repyga nhande mbopiro'yavo nhanderekote'varuhua hugwi. Timbohete ti Tupana'ga a'ero ndepyry hete nde Jesus'ga mbuhuruka javo.

⁵⁸Nhiirũ, ako hete ji pe ndehe. Pemondo ti pejipy'a mbotyva pejikoheteavo Cristo'ga rehe. Peporavyky katu hete ti ga pe ojipe'ġa mbojikoguka ga rehe. A'ereki pejiaporavykyrame garemimbotarimova'ea rehe pe ndapeporavykytehe pejikovo. Pekwaha pe a'ea.

Itambere'ia mono'oġa

16 ¹Ta'e ti kiro pe me itambere'ia mono'ono'oġa pe – akoja po ti nhande timondo Cristo'gareheve'ġa pe imbatere'ỹve'ġa pe Judéiapeve'ġa gwyrri pe. A'e ji Cristo'gareheve'ġa pe Galáciapeve'ġa gwyrri pe itambere'ia rehe ikwehe. Nahã ti peko javo ji ei ġa pe. Kiro ji ei jitehe pe me no: Nhirembi'ea rupi po ti peko no hamo. ²Domingo nanani ti pemono'õ mo imongovo penhonga pe. Pe napenani ti pemono'õ. He'yjuhurame peporavyky kwepykava itambere'ia he'yi'iva'ea ti pemono'õ. Mbohapyreterame peporavyky kwepykava mbohapyrete'i ti pemono'õ. A'ero ji horame pe pyri po ti pe herekojipei imono'oġipyra nehẽ. ³Jihorame po ti ji a'ea imondoukari penemimo'ẽhara'ġa pe nehẽ togweroho ti ġa Jerusalémmeve'ġa pe nehẽ. Togweroho ti ġa ġa pe ikwatijara no – kiroki omombe'u ġandekokatua.

A'ero po ti ġa imondoġ itambere'ia ikwatijara reheve Jerusalémmeve'ġa pe nehē.
 4Po pyryvame ji hoi pevo no, a'ero po ti ji ġa nderohoi ji rupi nehē.

Paulova'ea omombe'u ohoaġwama

5Taho ti pe pyri nehē jihorē Macedôniapeve'ġa gwyra rupi. A'ereki pevo na'ē ji hoi ġa pyri. 6Aerē po ti ji pytai pe pyri ovuhu. Amongo pa po ti ji yapoa jipytavo pe pyri nehē. A'ero po ti pe ji pokogi ojipe'ġa gwyri pe ji mondovo nehē. 7Ndahopotari po ti ji pe pyri aġwamo jipytaahi'viavo jate. A'ereki Tupana'ga ipotarame ji pytapotari manamehū pe pyri.

8Kiroġwe ji pytai avo cidade de Éfeso pe toryva rupi Pentecostes rupi nehē. 9A'ereki avove'ġa ġwendu pota kiro Cristo'ga nhi'iġa onhimongyavo. Tamombe'umbe'u ti ġa pe a'ero ġa mbojikoguka ga rehe nehē. Emo he'yjuhuve'ġa ji movahī tomombe'uyme ti ga Cristo'ga nhi'iġa javo ji ve.

10Po ti Timóteo'ga vahemi pe pyri pereko katu ti ga gapy'a inoġatuavo pepyteri pe nehē. A'ereki ga oporavyky Cristo'ga pe ganhi'iġa mombe'gwovo ji javijitehe. 11Tape'ei ti ga pe a'ero: “Ga ndokwahavihu ovoja'iro ġwaramo.” Pepoko ti ga mbohoryva ga mbuhuruka ji pyri nehē. A'ereki ji ga mboha'uvi jara'ġa ndeheve nhaneirū'ġa ndeheve nehē.

12Oro Apolo'ga no nhaneirū'ga. Apota hete ji gahoa pe pyri ikwehe novīa. Igwete ji ehetei ga pe toho ti ga jara'ġa ndupi nhaneirū'ġa ndupi javo novīa. “Ndahopotari tuhē ji kiro,” ei ga ji ve ikwehe. “Aerē pyryvame po ti ji hoi ġa pyri nehē,” ei ga ji ve.

Paulova'ea remimbo'ea mbapavava'ea

13Pejapyaka katu jipi. Pejiko hete ti Cristo'ga rehe. Penhimboita tuhē ti. Pemondo ti pejipy'a mbotyva. 14Pearōarō ti ojipe'ġa pejikojikovo jipi.

15-16Pekwaha pe Estéfanas'ġa. Ga na'ē ojiko Cristo'ga rehe ġwongapeve'ġa pavēi ikwehe – perope Acaiapeve'ġa gwyri pe. Onhimondo ġa onhimboporavykyavo Cristo'gareheve'ġa pokopokoga jipi. Nhiirū, a'e hete ji pe me tapehendu katu ti nanongara'ġa nhi'iġa pejikovo hupi. Pehendu katu ti jara'ġa nhi'iġa no – kiroki ġa Cristo'gareheve'ero oporavyky hete ojipe'ġa pokopokoga jipi.

17Jirory hete ji kiro Estéfanas'ġa ndura rehe – gaha Fortunato'ga pavēi Acaico'ga pavēi no. A'ereki pendakykweri ġa nduri ji pokoga. 18Onoġatu ġa jipy'a ji mbohoryva. Nahā ġa inoġatui pepy'a pe mbohoryva no. Pemondo ti imohina pejeaporoġita nanongara'ġa ndehe.

19Ásiapeve'ġa gwyriveve'ġa Cristo'gareheve'ġa omondo onhi'iġa pe me. Cristo'gareheve'ero Áquila'ga omondo hete onhi'iġa pe me no Priscilahēa pavēi jara'ġa pavēi – kiroki ġa ojatyka ġanonga pe jipi Tupana'ga mboheteavo.

20Avove'ġa nhaporemō nhaneirū'ġa omondo onhi'iġa pe me nohō.

Penho'anhuvanhuva ti Cristo'gareheve'ero pejoryjoryva ojogwehe.

21Jihi tuhē Pauloramō akwatija koha kiro pe me jipoa pyvō imondovouka nhinhi'iġa pe me.

²²Kiroki ãa ndokoi nhandepojykaharete'ga rehe Jesus Cristo'ga rehe – ãa pe ti Tupana'ga tombohahy a'ero nehẽ.

Kiro ji ei Jesus Cristo'ga pe: “Marana tá!” (A'ea ko: “Herejo orepojkaharetero!”)

²³Jesus'ga tomomyry pe me nhandepojykaharete'ga.

²⁴Opoarõ hete pe nhaporemo nhande jikoty'aro ãwaramo Jesus Cristo'ga pavẽi.